



勉菴集  
七

~ 16  
2374  
7

共二十三



和  
2374  
卷23-7

勉菴先生文集卷之十三目錄

書

答李致紹 承會

答崔景集 成烈〇四

答安敬賢 守恒〇二

答鄭應善 鳳基〇二

與盧賊五 應奎

答曹公習 任學〇六

答柳希興 遂重

答李陽來 道復〇二



答金聖則 在菑〇二

答洪稗度 鍾律〇五

答李汝直 養浩〇四

答朴寬玉 揆秉

答高華汝 斗鎮

答金德文 純默〇二

答曹學敬 錫一〇三

答全聖彬 道炳

答金聖溪 兢淵

答文敬於 載熙〇二

答韓希寧 儉〇二

答慎文染 宗錫  
仲和 宗璵

答柳夏達 洪錫

答鄭孝先 成根

答朴孺玉 琳相

答李章玉 斗煥

答文世元 濟普〇二

答曹伯據 憲承〇四

答池致用 憲夏

答朴思明 燦文〇二

答李昌輅 殷相○三

答李昌穆 文相

答李元景 潤星○三

答李禹卿 相夏

答魏致儉 啓温○二

答朴士一 源東○二

答高季文 禮鎮○二

答文潤伯 圭簡

答文成汝 炳斗○二

答慎文華 潯晟

答趙而慶 承善○二

答李景五 奎烈○二

與慎敬之 宗軾

答魏殷弼 商貞

答鄭致行 敬和○二

答郭允道 漢紹○二

答崔仲說 濟學

答金皓一 商綺

答吳聖陽 鳳承○二

答趙宗頽 愚植

勉菴先生文集卷之十三目錄

勉菴先生文集卷之十三

書

答李致紹

承會○丙午九月

草梁相送迄不能忘荐奉德音何感如之顧此老朽  
無一善狀而猥蒙賢者愛不知惡粵自癸酉至今年  
患難困阨動輒相隨不計利害士窮見節義殆左右  
之謂也但異域殘喘無復對展為相長之道則寧不  
慨然念昔尊族先有心齋先生以泉門高弟講道王  
屏山中時則我曾王考嘉陰公實從遊焉而尊王考  
老玉公亦嘗出入其門為先生之所嘉獎則吾兩家



事契之篤其來已久而左右所熟知也各自勉勵毋  
墜先訓豈非吾輩繼述之義乎益將死矣不足言如  
左右者東隅已逝乘楡非晚幸杜門歛迹益懋德學  
以究先公未卒之業如何萬里奉勉只此而已寒暄  
不暇及焉

答崔景集

成烈。戊戌三月七日

前此付數字想或關聽而無見領語甚可訝也茲拜  
寵翰知御者移坐村塾可知有靜中所得尤可喜也  
衰世寂寞座下能如此羨首豈易易然必須奮迅踴  
躍大進一番方有歸宿處幸不患莫已知或為可知

若是今日究竟法耳未知如何享祝云云或者擲推  
可且置之原文大致意則甚好只措辭曲折未知其  
十分稱停兩賢分上豈無捨此而別般材料之可見  
意者乎此在多士之商量斟酌而決非局外人可否  
者也

答崔景集

戊戌十月二十日

絆繫蒙養雖未快活因時儉德無往非吾輩得力處  
為之健誦益年來經歷殆禪家所云三災八難因之  
精神氣魄十喪八九尚在人鬼未判中姓名三字猝  
為時類所擲揄致得無限困境未知自外人觀之當

作如何議論也耶

答崔景集

巳亥三月三日

有來無復太涉簡慢倘不致訝否謹問伊來履用動  
靜萬重墳簾甚樂講疑辨惑日有佳趣世間真實事  
奚踰於是世人自以為得師者可歷歷數矣而要其  
究竟則斷莫如卷中師友為其廓然大公無毫髮自  
私之意也古人事雖不可輕學亦豈可曰我何敢當  
而一於退托哉每見教意自牧甚謙處人太重殊非  
所望於朋友也幸加商量

答崔景集

甲辰丁月二十六日

嚮枉獲於積阻雖值在病席未克叙穩厚意何敢忘  
也即拜寵訊審閱理存養日有佳趣此乃長夜中一  
把火消息心焉敬服自不能已不只為阿私之言也  
示諭多少理合如是但學之不講事到面前酬接不  
去者為可悶耳且以今番事言之苟無白眉丈苦口  
謀忠與夫諸士友更迭規戒之為則幾陷坑塹而有  
餘矣自時人觀之又未知作如何斷案耳

答安敬賢

守桓○辛丑五月十四日

互鄉二字莫省其意豈僕於前者有或以習於不善  
致意座下者耶若又未然則語病不可不慎未知感

意何居焉至若王承云云尤不觀貼雖十分好語施  
失其地則便不神奇亦加商量前此蚯蚓聊以先輩  
格言為初學先人之見而已曷嘗以書名自居而為  
標榜之地者耶幸須益加反覆浹於心而上於口以  
為晨夕收斂之地千萬千萬僕衰相轉甚日用事為  
都付在雲霧界中於紙面一事可想其大略矣諒恕  
如何

答安敬賢

甲辰五月

示諭曲折愚亦驗於稗孫而未得其十分好道蓋近  
來兒習與前判異不遵父祖之教而近則不遜遠則

變色一病也慧寶未開厭證居多無望其粹然自覺  
致於悅豫之境者二病也易子而教雖是古法又豈  
不曰中也養不中才也養不才入樂有賢父兄也乎  
惟勿忘其所事事而匪徐匪亟因勢利導之外更有  
何妙道耶

答鄭應善

鳳基○巳丑六月二十八日

拚別歲積緬想高風渺乎若天門闕苑可望而不可  
親頃者丹城權哀袖傳惠訊得之若驚適值撓冗闕  
然稽謝中情蘊結如物在喉令姪事耳根尚存略有  
入聆而人心不如我心做時不似說時是自古通患



事不完全於慮善之始則終難填補於無奈之地其亦勢之使然何獨自引於不當引也無論成敗愚則一言以蔽之曰當日緩禍都是諸公之力也享其功而從傍譏刺吾不知其何見也

答鄭應善

辛丑十一月十七日

早春分辭迄庸茹悵獲奉德音慰瀉可量敬審棟體震良對時萬旺尤愜願聞重翁所教辭約而旨遠可為座下終身誦之之資而誠字註脚思傳已備更何用後人之推演耶唯真實心地刻苦工夫亦不害為君子思誠之一道幸益加勉旃僕白首無聞何敢妄

與於天道人道之說耶向呈碑文疵類甚多有此考正竊為萬幸依示塗乙本草還完如欲十分無悔則須北黎眉大手易而新之千萬千萬益初夏遭抱川從弟喪老懷悲苦久難寬抑惟幸兒孫輩無顯頓耳

與廬賊五

應奎○乙未七月十六日

一日不見古人比之三歲况一年二年至于今日而彼此漠然者乎雲樹涯甬逐日憧憧唯不疾而速不行而至者而已秋雨頻仍沴氣肆行謹詢是辰經履起居閱理墳典引接來學依然如疇昔家計近年以來歉荒驛騷劫運大同窮厨百須能無憂憂難繼之

歎否時事到此死固宜然生非可樂奈何奈何蓋天地之生萬物聖人之應萬事只一箇道理而彼販君賣國之輩一自賦形之初讎着道理百般揣摩恨不得一席無道一息無理之時以肆其猖狂自恣之習也是致不得不與豺虎犬羊腸肚相連傾覆四子等父母之邦者固元惡大慙乖常戾氣而官守封疆之臣未聞有一箇半箇倡言聲討者豈意五百年培養之澤如是其斬然無餘也耶痛矣痛矣吾儕之提警畏省何時可已而當此剥膚措躬處義尤極艱難幸十分努力以其餘破沾得老朽之物如何如何損未

昨年正月哭丘嫂喪長婦二箇幼穉零丁善病開顏無日尋以六月大變扶病晉至門外十里地審知城門阻絕無可奈即即回程喘息至今是可曰陽界人事乎付書一路前知邸吏家形止而衣服爲拘少年京行亦且斷絕不得如意今因晉陽轉便略伸平安

答曹公習

在學○戊子二月十一日

別紙縷縷實仰好不知惡之感而自念陋拙萬不近似此後往覆都除却違幅如紙面稱謂與其他過情等語切勿及焉則可安賤子之心也第承近日盛課在塾教一篇甚盛甚盛當此洋瀾滔天民彘墮地之

日上自廟堂下及閭巷此等文字故不可一人一日  
不講也而見今都下物情視聖賢文字便同仇讐所  
志所樂惟在歐巴窠曰真可謂咄咄怪事萬望益加  
爛熟以爲終身受用之地千萬幸甚

答曹公習乙未十一月十九日

天乎天乎此何人斯履霜冰堅毀服可能也弑母  
可忍也何變不做何惡不積畢竟勒剝之禍至及  
君父而將使舉國之內無戴髮之人噫誰意天喪陽  
脉如其慘酷也蟣虱殘喘雖無足言主憂臣辱主  
辱臣死義固當然而覩面苟活真家國一罪人天地

所不容復何云喻二友分表見顧惠函落案披展三  
復慰敵蓋簪且是昨年變亂後初消息也謹悉賢駕  
自山丈門下還向仙扁行中啓處一例珍勝大度并  
依宿樣千里懸懸是外何望示教云云非只擬倫不  
當若使待我以賊邊者看之又安知不並與高明而  
陷叔司緣坐之律耶賤狀自昨年以來毛髮肺腸偶  
爾齟齬枝龍友之口吻筆端戈戟坑塹殆無餘地暮  
年竒恠真何謂萬事無不有者也亦是數也奈何奈  
何多少話言之長也非斯頃可盡長夜失眠神不守  
宅荒蕪至此幸乞恕照

答曹公習

戊戌六月二十一日

乘榆垂迫俯無強輔所欲與會心人朝暮周旋追補  
黥劓於萬一者何限而涯角相望徒切瞻誦即者手  
命入眼分外欣豁萬金不換謹詢伊來尊府寢膳康  
寧感課專篤見在何經營茲瘳炎似無過從酬應之  
勞往復書牘之煩及此閑暇將已讀已熟之書反覆  
然攷覃思細繹以吾友之高明篤實迥出儕等其必  
有卓然見得處矣此愚區區之祝也俯詢從前伎倆  
都是鶻圖吞棗至若裏許無論難易漫不知何事以  
高明之知我甚詳而乃有此云云耶至於年號一款

恐不可循時雷同未知山丈教意亦如何文字事始  
既不慎終難收拾往往有自誤誤人處悔恨何及茲  
承教及實感愛人之德也謹當奉以周旋耳頃者  
因封力疾伸情而儀仗文物皆是窺見近日京毛頭  
緒多端又未知末梢之作如何事樣耳

答曹公習

辛丑四月二十三日

省禮座下孝子也養生之摯愛日之誠神實監臨而  
連年大禍何其酷也天地之大人有所憾豈是之謂  
歟尺紙修唁不宜遷延而頃者農山友人之回適以  
文字之役鈍根伎倆不遑及他以至於此曷勝悚仄

益家門不幸家從之少我四年者遽以前月傾逝痛悼情私不容言喻重以客寓力屈未克臨訣於入地之日獨立踽踽不能定情自恨老而不死忍見許多變境也頭流之約偶失順便再理筇屨斷不容易見今旱災到極苟全二字亦沒下手處安危存亡只可聽天而已

答曹公習

壬寅七月十三日

一蹶尊扁雖遂素營別後悵頽罔以為喻茲者賢姪遠存珍緘續墜謹悉伊來潦炎棟床制體萬衛大度佳勝慰百常情僕三夏途道誰其使之而精神則太

半疏蕩雖夜朝間不見安靜意思本之不立其發自爾謂之奈何示喻縷縷如非愛我之摯何以聞得此警於坐受之中甚感第理既缺闕於慮善之地事莫填補於受謗之階者如此只當任其張皇而已入山後凡屬云云都歸放過六宜之託亦要待來日耳

答曹公習

癸卯十一月

立齋事雖屬過境國家之倚重士林之旃幟顧乃何如而天不憇遺乃至於此殄瘁之痛遠近同然矧如座下黨多有素情義篤摯別於餘人者乎別來歲周翹誦政勤獲茲珍函備悉伊來寒節棟床動靜神

勞安迪庇下凡百並享佳勝當茲大亂只麼經歷亦  
吾輩一日之福也幸何可言損末昨夏流連太涉過  
分今年一著連以憂患從事未有乾淨時節乘除之  
理不可誣也內浦云云係是當來而勞無他機軸因  
人和應有若黨論者不滿一哂耳其前頭利病只當  
任之而已近患河魚臨紙手痺未克盡情仰惟恕諒

答柳希輿

遠重○辛丑五月十六日

別來歲積便同忘域而英標雋音宛在耳目雖欲已  
之而不可得也頃於嶺表之役少寬日月庶可奉晤  
而巧值魔障竟失盍簪世事難完又復若是奈何農

山友人便珍翰趨宜修覆而稽緩至此倘不以簡慢  
見訝否教以克已復禮為內修外攘之本而刻意勉  
厲云云所以警提昏怠者不啻頂門一針耳恪詢日  
來亢旱尊候萬重尊閣在何書濳造自得想日新又  
新恨不得親近懿文叩承緒餘也益客土踽踽遽承  
家從函報卒襄已過萬事邃古痛苦不可言

答李陽來

道復○庚子

佔畢思辨昔非不足而想益親切日臻昭曠之域為  
之健誦此邊家計專是舊日伎倆同寅協恭偕之大  
道斷無其望除是運化所關奈何奈何重菴丈之躋

配先壇外雖似是而近捨華翁有此徑庭其意未可知且告由一款本是自家蓄減中流出不足介懷只得置相忘之境而已所欲言略多曲折而遽思短姑此不備

答李陽來

癸卯

料外郭雅左顧珍緘落案披展三反蓋不止為平安二字之可眼青也新移大明之洞井曰就緒講孔朱之道續風泉之什優哉游哉聊以送年曷可不謂缺界一清福也耶僕三夏計活以內外憂患從事苦無佳况重以謗言四集擡頭不起者非止一端笑顧過

境無恠其然而第以一時无妄之舉轉及於不干師友之地則尤切兢慄耳

答金聖則

在籍○癸卯八月十四日

轉移間金火交遞白露蒹葭懷詠益勤珍札入眼謹悉嘗聞寢膳一例康寧諸百佳勝當茲朝不慮夕之會安過一日乃一日之福餘何可言身軀蠱服勤之餘親近方策誦念服習自是舉世之所未聞而君能之尤切歎仰只將此心自強不息則陳了翁我亦可學之訓豈獨專美於古哉損末三夏經歷憂患也艱食也除是衰境未盡底亦一風霜又不知幾層艱危

隔在來頭只可任之而已竹軒文存養所到固意其  
依例衛重而承此委示尤切頌荷匪分之饋徒增汗  
顏承有前期預庸企仰

答金聖則

甲辰七月十四日

戀德方勤手命入眼謹審庭候崇在河魚夏秋之交  
老人例證非時日可差完深切貢慮時事誠如所傳  
其無國一也終未聞有一个臣以死生關頭擔著向  
前者只切痛哭老記昔者疾與之廝殺神不守舍脉  
不制肉近半生半死之蟲雖是勢也苦况則甚謂之  
奈何重修記朽淺名字本不當塵穢重地兼以叙事

顛倒致煩物議駟不及舌悚仄極矣今胤課程長得  
幾格竹軒文安否間復若何

答洪穉度

鍾穉○甲甲十二月十七日

疇昔分辭人情所同雖不可挽當此窮涸曷勝懸懸  
書來知行李中止動靜珍恙稍庸慰釋柑料想應過  
去而或者掛名否損契省側類愆憂遑度日兒亦未  
還凡百冗故又此關心極以為撓耳時事何如云爾  
罪人尚未斯得則前頭禍患似非已往之比而上下  
恬然無變動豈非可恠者耶當茲驛騷中外事端不  
一其慮須十分審慎過去如何固知高明之昔非不



足而相愛之餘猥此仰溷知相逢有期預切慰滿

答洪穉度

丙戌六月五日

兩度手墨極庸慰感且滿紙縷縷迥出情曲孰謂書不如面也進修之工想應慥慥日有佳趣復何勸勉為哉前書別幅非但文辭之條暢其向學立志可見卓乎難及之氣像念來自不覺喜而不寐幸望一承權輿以為吾道之光如何記下老親氣息去益奄奄情私悶迫何可盡喻

答洪穉度

庚寅六月二十六日

往歲手命揆以涯甬奚啻驚感因出沒病席卒負高

期數千里辛勤之情者為可歎荐奉德音三復珍玩慰敵對展從審侍養佔畢不懈益勤遠外翹荷何以加此示收斂身心誦習魯論八字尤以見年來進益新而又新決非物外得喪所能容易變動噫此故不遠之復也慰何可言情未纔及免喪疾崇頻仍振刷末由崦嶼光景理合如是何足恠也萬望益加淬礪以副遠懷

答洪穉度

癸巳十一月三十日

山海鯨隔所照者心未嘗非朝夕遇也左右年屬方壯完養有素決非無端強言病者又嘗熟講於夫子

所戒之訓而然存云云則茲其中必有悶於心而形於言者曷勝貢念每見知舊間有意此事者多為貪病二字所引牽拘掣而前却者十之八九矣豈天故欲此道之窮而真胡醜類始終得意之張本也耶殊可恠也記末窮廬吟病去死不遠第以東郡一隅為依歸之地二年之內儒賢與大官并為云云顧此黑宰世界只麼殘生何以為懷

答洪穉度

乙未四月一日

病伏窮山方切懷人海鴈傳信乃穉度手墨也以其時則風塵搶攘之中以其地則水陸渺茫之外詎非

奇乎奇者歟仍審比來省餘學履清勝單度佳迪蒲心欣慰不容名喻損末衰朽日甚只自悶憐而逢此亂極只羨萋楚之無知耳今日桃源莫如漢挈而左右可謂爰得其所則所當致力者不過躬耕讀書二者而已望須益加努力以副士友之期待如何

答李汝直

養浩○辛卯

嚮在二月末間轉奉正月二十日出書審伊時在途及友面後諸百動靜委曲如促膝對展讀之津津尤以見周詳縝密之一端也承以塾教之篇如小兒上學樣為新年程曆云者令人羨省可作頂針重菴老

翁嘗謂今日人事極蕩專由敗闕於小學其訓及門  
諸子無論過時與否莫不以此為入門指南者其意  
切矣誠以此書家誦人習踐履作用如茶飯菽粟則  
彼天外異類何敢干我一髮而舉眼接耳搃黑窳窳  
地絕無蚍蜉蟻子以此箇道理導吾君迪吾民者痛  
心疾首其欲無言匪類之熾設法以禁之猶患滋蔓  
况尊其人師其道而求之猶恐其不及哉此則必至  
之勢也杯水車薪勢雖不敵為之在我不容暫緩幸  
益加淬礪自身而家而達于鄉黨邦國則真不負朱  
先生辛勤編葺開牖後學之苦心而亦所以奉承我  
君父之大訓未知如何山水之約雖不頓忘振刷之  
難有同扛鼎何可質言耶

答李汝直 辛卯

即奉手命傾倒之餘具悉間來營闈寢膳少貽愆和  
旋奏差復坐在隣比聚徒講授非只為學半之力於  
收斂定靜之地極不無居安資深之味深庸貢慰僕  
年來無毫末可道者內而憂故相因展眉無日外則  
謗言遷至其說甚長自反悚怩雖難抗顏苟求其實  
亦未知孰為得失只可任之而已小學書讀至幾遍  
而能終身不漏忘否重菴文舊崇更作寄在陽界恐

未幾年孤危吾黨將未知駕稅何地奈何奈何家兒  
遠出未返極用悶沓畿甸年形大失所望公私憂慮  
極其凜凜而滿國泄泄視若尋常豈天意人事如是  
而止也耶

與李汝直癸巳

心乎愛矣豈不謂矣中心藏之何日忘之十六字未  
嘗不為賢者日一諷詠也謹詢秋高侍餘學履一例  
鄭重十口計活何以苟全豈知吾輩無他計策惟力  
田股勞豐則僅支軀命否則溝壑乃分未知近日事  
更如何僕百般衰相無一可向人言者惟去冬始得

一孫見方匍匐目前此為未死之一樂也耶具友無  
言其已往得失扶病發程後因無通信之道甚鬱牛  
耳少年謂我再從叔者又不幸短命其人沉靜極有  
步趣文字亦可尚竟至於此亦老夫之不幸也奈何  
奈何重菴墜事係是斯文厄運而日月易得大祥不  
遠俯仰穹壤此時何時隻手支厦更有其人耶想左  
右同此懷也唯冀力學加重

答李汝直庚子四月二十三日

頓首德門積蔭蓋非一日而天不助順數年之內喪  
禱荐疊曾足料外吾黨之雲雷水山何其甚也孝思

之哀痛迫切尚矣勿言餘外大綱禮制多口契活雖  
優於措手者尚云多艱刻哀事勢便同弩末衰季物  
情日以倒懸塗抹打遣烏得無憾然古人成立罔非  
自困窮拂鬱中做出來不須作歎嗟語近兒女子情  
態也書後日富孝體動止更何似僕衰相日迫百事  
廢弛中重以南爲一款添得憂端未知何日快得定  
頓是知風霜餘綠尚有未勘而然謂之奈何

答朴寬玉

揆秉

料表獲奉德音披展再三珍敵百朋笏緣家冗不得  
專力誦讀雖屬可悶自古修經之士曷嘗有離了事

物終日關門而方謂讀書者乎隨地接應莫非吾進  
德自強之材料先聖所云餘力學文者政謂此也未  
知左右以爲如何記末一年所事無一可陳只有村  
秀數箇蛙聒席側可破悶鬱而餘外聽聞俱屬耳外  
時欲溘然者有之此無乃性情之透拙處耶呵呵

答高華汝斗鎮○丁酉十一月二十七日

山門拚別居然為周歲先陰逝斯之歎良有以哉珍  
函遠墜驚倒可知矧又近來一樂之依舊萬重者乎  
夏間行役雖失秉牌爲我用情更有其誰受賜多矣  
貧窶二字雖甚可惡實是吾輩之生來本色不必作

感嗟語須從這裏破著脊梁無至搖動我一片靈臺  
不能不厚望於高明也損末閉戶吟病計以一日強  
半頽臥不省人事似此貌樣生何可樂只得與幼孫  
輩為知己友講之無字庶不為專然無事者亦云滋  
味也耶笑呵笑呵金君告歸略伸謝儀

答金德文純然○已丑三月二十一日

下君言歸適者忽撓未及修謝想蒙俯恕而中情怒  
然殊若物在喉不下也居爾春暮省餘佔畢一依疇  
昔大禹聖人尚惜寸陰矧於凡常可任其斯湏怠惰  
而欲臻於高明廣遠之域者斷無是理幸朝夕乾惕

無至泛忽如何鄙人兒患以今所見似不更肆而精  
神也面部也太半變易殊沒舊日樣子未知末梢之  
作如何究竟也職名云云尚在待勘中近日事之無  
頭緒每多如是奈何聞感課在塾教篇上可謂知先  
務矣朱子所云真正大英雄未始不自戰兢臨履上  
做工夫者可三復不置也幸多讀遍數爛熟而後已  
可有得力未知如何

答金德文已丑八月二十七日

先墓石儀幾為竣事追遠孝思令人欽敬示意可謂  
問日於瞽也自按不暇有何餘見可及朋友只未之

思也何遠之有八字真聖門親切示警處幸加喫緊  
下工勿看作一場過去說話如何

答曹學敬

錫一〇丁酉十一月二十七日

懸仰之餘承此委翰慰馮不容言竊念座下之於僕  
觀其人而聽其言矣醜拙本色露盡無餘則其在相  
愛之地宜加老牛之鞭而顧乃不然屬意過重措辭  
太謙有若見處以求助乞言者得非過禮之恭歟悚  
仄不堪當惟迨此未死思欲藉朋友提撕切磨之力  
前後扶將左右推挽冀或幸至彼岸之意未始不耿  
耿而崦嵫景色振刷末由涯角相望盍簪無路臨風  
引領只有切怛東塢文文字臨時掇拾聊寓附驥之  
願而已非曰體制成樣而取必其入用也

答曹學敬

戊戌閏月二十五日

示喻可謂發病而尤藥其在朋友相勉之地故好反  
復切磋而奈所養麤率自無得力何吾友省齋翁嘗  
有言曰心一敬時如大明中天人物定位心一放時  
如昏夜乾坤鬼恠橫恣乃此翁喫緊體驗中流出來  
說話也愚嘗願學而未能蓋立志莫如敬敬是率氣  
之藥石也只在默默加工不用問人亦非外人所可  
幫助未知謂何益蒲柳孱質日就頹耗新知未抽舊

聞日荒無可向人道者只得以此就木自愧自愧

答曹學敬已亥六月二十六日

曩者瓊函荷意甚勤遽遞稽覆迨今訟愆承有珥慎  
豈養靜太過未暇宣鬱而然歟間以遊詠蕙舒精神  
前輩攸訓亦不可不念也益老頽日甚百事顛倒循  
其本末只一壤蟲頓無可爲遠朋道者封章云云喘  
息尚存聊以見犬馬之忱而已每恠時人多有過情  
之譽不意悉我如高明者亦為此分外說話徒貽傍  
觀之拊掌也蓋今時象乖亂到極莫有底定在吾輩  
責任惟守身謹節無負帝畀之秉者是究竟法門而

日迫崦嵫無望責成所存只望朋友之時加鞭策幸  
隨聞隨見無只爲閑漫稱許者是區區之願也

答全聖彬道炳○辛卯九月二十三日

嚮蒙遠顧信宿款曲感幸之私蓋不足以泓穎萬一  
而只緣空疎蹇劣無以副詞藉好問庶感意則殆汗  
駢自疚固知所諭即者荐奉手命拜審夏秋來省餘  
學履佳勝至以有意此事無向前擔當底氣爲憂則  
殊非愚之所願聞也人之於道不可暫離如飯衣柴  
水之切於日用曷嘗見欲喫箸搬運而不能擔當者  
耶顧在心之用不用如何耳此蓋賢者所已知已能



而猶此云爾者豈以為目前道理外別有一層玄遠而然耶幸益加勉策以卒大業

答金聖深 魏瑞 ○ 癸卯六月二十日

貽阻勢也相信者在曷以面不面為緊漫不意獲拜珍緘具審伊來省候萬重大度佳勝慰荷罔量畫而服田務供甘旨宵而方丹培壅性命今日董邵南有幾人哉下此則不過擺脫防限計較功利之說也尋常翹注實不以聲音笑貌也益昨歲南為蓋緣不得已之爭端而畢竟行不見乎動輒得謗此在反省補過未始不為屯山之一助而已然之事不須嗷嗷發

明只待是非究竟之如何耳至若攻斥先輩云云大不近情蓋尊畏先輩講明義理乃是並行而不悖者故以若晦翁之尊敬兩程而不取於經傳訓義者何限勉齋之傳鉢高足而致疑師說者亦或有之則是亦以攻斥目之而無實情之原恕也耶茲蒙示及略貢鄙見幸加反覆理到之言斷當商量歸一計料耳

答文敬於 魏熙 ○ 戊戌閏三月六日

匪意承手命備審棣床湛樂講習切磋相為知己何慰如之來示滾滾發揮出仁義忠信正心收心之要見今洋瀾滔天彘倫塗地之日可謂太平氣像直令

人忘却老之至而死之近也然而考晦翁所訓則說  
持敬又必說致知而至其用工節度則曰默識此心  
之靈而存之於端莊靜一之中以為窮理之本知有  
衆理之妙而窮之於學問思辨之際以致盡心之工  
惟如此然後乃可以外內相資動靜交養主敬致知  
之方兩得其宜矣幸更浚繹而刻苦用力如何如何

答文敬於辛丑

示意謹領形氣神理本是合一之物惟在揀別看如  
何如太極陰陽五行同在一處何嘗有露頭底太極  
不相關涉者耶且所以然所當然亦不過以當體本

體分說者孟子所云形色天性何嘗屑屑於理氣界  
至耶幸放下此論唯致力公私善惡是非淑慝之分  
而加存養省察之功則漸見其孰是天理孰是人慾  
而於目前受用庶見其不中不遠矣未知如何妄言  
至此幸加反覆

答韓希容

○辛丑五月十四日

杜門索居強輔無人足則所傾心於高明者殆欲已  
而不可得也茲奉珍緘謹審侍餘經候神休愷悌大  
度依寧慰感沒量坐而講習出而應接乃所謂理事  
相涵牽連為病在他人容或可言於高明有甚可憂

者耶龍溪好古之病殆萬牛難回只得任之而已華  
翁文集事力苟艱帙數多寡較應副諸處十不能一  
令人可歎至若心說異同感論甚富雖使夫子家奴  
復起恐無以改評矣

答韓希審

癸卯九月一日

謗言一款在故鄉時略有傳之者愚則笑以為傳之  
者過也先輩緒論後生從而講究亦多已例若以此  
而索癥則講學一節當永為邦禁不復聞是非可否  
之端云矣承此教及可知訛言傳襲彼此無異同矣  
何嫌之有萬望益自淬礪以樹脚跟

答慎文榮

宗鎬

仲和

宗燠

○乙巳九月三十日

未照光景雖屬待盡時或起念在德門詩禮之盛真  
境水石之趣未始無翼如接穩之意而奈足目俱衰  
無以為力何只切磨詠際承德音細悉侍候長春棧  
床供歡尋數講磨日有事在遠地慰幸奚加於示  
喻云云係是撓謙所發只道在近而人自遠之事在  
易而人自難之都在用心與不用心如反覆手相似  
耳千萬勉旃僕百疴侵尋惺惺無日算當以此就盡  
何足言

答柳夏遠

洪錫○戊戌九月二十日

昨歲宿宿講討久令人不能忘懷料外惠問實感不棄之盛注也示不能力學之歎是果出於真箇悔悟從此自勉之心則既知如此是病便不如此是藥豈非朱子至訓乎若出於紙上虛文苟且矯飾之意則今日自歎如是明日又歎如是天下許多事業豈容坐歎可做左右資質極正工夫又得階梯正須於此兩者審其真偽虛實以日去夫非真非實者而勉力焉而已矣何必遽為自畫之計以廢棄自處耶感相愛之至敢此不擇蕘耳益醜差之狀比昨年尤減一倍且仲兒忽嬰奇疾至于今未瘳直覺生之為苦也

神主之制以工人之不敏小有分寸之誤則埋安舊主改造新主何如

神主失制不可改造已有退溪定論不必更疑

神主陷中之題云云

筭幾之規我國不能行故神主陷中亦多不書且筭字是行筭之義非昭穆之謂則雖或以第一第二書之復何有隨時變改之端乎

答鄭孝先

成根○辛丑十二月二十三日

僕無他兄弟只有從行一人涯甬分離相恃為命忽焉傾逝心兮痛惻割去半體尚屬歇后杜門念愆與

死爲隣茲承問慰篤摯泫然之涕感極尤零備悉侍  
養震良對序珍忘大度依昨何慰如之二人交戰云  
者未知其指摘何病而無乃謂客念浮念者耶既知  
如此是病則便不如此是藥然亦非卒乍間可得力  
須另立一副規程勿忘勿助積之之久庶或有彷彿  
歸宿處未知如何僕怕寒龜蟄無可奉聞

答朴孺王

琳相○戊戌九月二日

豺狼叢中得左右顧存於千里之遠者不可但以偶  
然言適值凌遽雖未悉所存之梗槩而其秉心確然  
不爲物遷略綽想像料外手命入眼細審侍學珍重

佔畢家計日有事在心焉慰浣足當對展菽水寥落  
是前輩所不免况今時物情去益萬萬相懸而重之  
以率斂食人者乎衆楚之喻自古已然人而不學則  
已既曰有志則豈可以小小俗論掛在念頭爲弛張  
進退地耶在左右固非慮此而竊因示及漫布止此  
想應俯恕

答李章玉

斗煥○壬寅三月二十七日

不以我衰陋而逐年躬枉深荷不遑之情遠路書訊  
不一月而繼至非情愛之篤能如是乎月前返旆時  
雖風日少辭重關行役不無憂念承審無擾利稅是

協宿禱暴棄之示若知如此是病即便不如此是藥  
若徒發歎恨語濟得甚事願益加勉進無至如孟氏  
所戒甚佳甚佳益與病為鄰神昏眼翳雖尋常書札  
尚不能仔細究竟况細成長問乎姑俟日後精神稍  
可而亦未可知也亭號尊先既以竹為號則今於名  
亭之日只以綠猗二字語意俱好未知如何

答文世元

潘普○丙申六月七日

僻地惠音真一字千金從審比來重省學履珍勝又  
知發軔向上意想甚好澤麗波及我雖無能見善服  
義曷不聳喜貴近賢師友在焉不患無就正只拔來

報往進學之忌高明寧有是也示設壇之不由朝  
命而私自躬始誠有不尊無證之嫌而公眼通觀決  
知其僉君子用心惻怛處義明白斷自天理中流出  
而非由毫末計較之私則今於事竣論定之地異同  
差殊亦涉閑漫說話故不敢可否於其中以犯不韙  
之罪庶可默諒

答文世元

庚子十二月二十三日

前此俯存美啻百朋而懶怠成習遠友之費情致問  
容易稽答十居八九雖無顯責心豈可安剛侵而長  
歲聿云暮謹詢是履侍餘學履連衛大度並何似前

書中應有多少忠告之可奉覆者而健忘用事收拾  
不去只壯年易失寸陰可惜惟克日孜孜庸副知舊  
之望千萬千萬

答曹伯據

憲承○丁酉十一月二十七日

春初枉存厚意何敢忘反復來示處久太高自牧甚  
卑決非所欲聞者而其處以一室事契不我遑棄則  
感慰之極不知攸謝華翁文字僕亦函荅未有所得  
然以其大義則倡主理之學任闢邪之功其汎掃風  
雨再造區宇之功依然與蘆沙大爺一般公心一般  
力量決非近世拘儒所可彷彿其藩籬也省去看來  
沉潛玩味庶知愚言之非大段妄談也僕類關日  
甚絕無為吾友道者惟高明視為前車倍百用力以  
其餘破推及老朽則受賜多矣

答曹伯據

戊戌閏月二十五日

千里德音雖欲叱之而不可得者矧命辭條暢行墨  
謹嚴苟非心一乎誠而表裏相涵斷不如是可愛可  
敬古人橘頌之作真先獲矣哉迨此世遠人亾教弛  
俗頹之日終歲簡冊優遊為樂上奉皇天之付畀下  
述父師之緒業蔚然為吾黨之倚仗者高明恐不可  
讓與別人也萬望千百其工無恃其所已能而益厲

其所未至如何如何荷茲眷戀漫以布及庶不以為  
僭汰也松沙丈安否近復如何何承其先集重刊之  
報矣豈刪削規例尚有未盡而然耶

答曹伯據

戊戌八月十一日

想足下於千里之遠香矣若天門閶苑可望不可親  
臨風懷仰實非例語即茲金君遠涉珍函入眼披展  
三復不覺沉疴之祛體也就審間來侍歡珍勝晨昏  
餘力所專者德性所事者間學外承師訓內述家法  
蔚有可道甚感甚感奉勉者只必有事焉而勿正心  
勿忘勿助長而已復何待外人剩語為哉蘆翁集竣

事至此為斯文幸甚若非松友之十分繼述烏能如  
是心擾手木言不盡意幸望恕照

答曹伯據

己亥四月一日

月前惠翰意甚腴摯雖於尋常朋舊得之銘感宜如  
何況於高明乎反復紙毛可敵拱璧而適會煩劇未  
克修覆倘無以簡慢致訝否晨昏之餘幹蠱之隙尋  
數玩索想有一副程曆為庸欽誦因竊念尊王考東  
塢公學宗蘆翁行滿鄉邦根基綱領固已浚厚正大  
繼又高明稟姿超羣奮迅踴躍紹承闡繹之法門梗  
槩自有著見於心畫言語之表者當茲人物眇然之



日吾黨光色尤當如何幸千萬努力僕病字支離不須言惟歲前作為自以一息尚存專事會默殆非分義所安乃有多少云云竟致謗言峻發風色崢嶸語默之不可不慎者有如是矣亦且奈何

答池致用

愚夏○壬寅二月十日

歲改春仲戀湖非虛語也亂君至從審近日孝體支福何慰如之僕乃老而無聞之慳慳一野農耳茲蒙尊慈見處以蓬麻之列橫豎反覆輸盡心肝如門內人此殆亦諸古事而難得者尤以見哀侍破藩籬均物我之感出尋常萬萬惜乎臨去不遠無以助下風

者為可愧教意不須索言只令受而為過以追來者甚當耳

答朴思明

燦文○戊戌七月二十二日

村秀發蒙人雖不屑愚則謂此亦男兒兼善之志展拓一分處竊味示意想以人事下學外別有上等高遠處此亦病痛奉勸左右姑此備閣斯一段妄想專就日用間平易處隨事照管分別其吾心所發敬怠邪正路頭而致力焉則所謂上等道理自不外此而得之矣未知如何記末三夏所經真是苦海世界神精脫落收拾不上只切自憐耳

答朴思明 己亥正月十一日  
塾教之篇故子朱子開牖後蒙之一大事功也苟能  
家家而誦習人人而踐歷彼一種真胡安敢肆其縱  
恣而東漢舊俗淪入於腥羶之域哉但世之人以小  
善為無益而不為也小惡為無傷而不去也因循苟  
且之間自不覺淪陷於遺親後君亂常之科此其可  
哀而不足恤也吾輩既以讀書為名則其於從違取  
舍之間可不知其所擇乎來示云云可謂得其要領  
無可改評幸多讀番數多入商量無只看作小兒工  
程千萬幸甚僕依舊是半上落下底伎倆何足為吾

友道也

答李昌輅

殷相 ○ 戊戌七月二十三日

敬齋箴曰弗貳以二弗參以三貳與二字參與三  
字字義各同而曰貳二參三是何義乎朱子曰一  
件事了更加一件事便是貳一件事了更加兩件  
事便是參抑貳是自一箇而添一箇未全成兩箇  
時之事參是自一箇而添二箇未全成三箇時之  
事耶

說主一之意不得不舉二三字以為對病蓋不貳之  
為二則便是一矣不參之為三則亦是一矣與德惟

一德二三義銜照則可見

明倫篇題註朱子以養老習射教民釋庠序校而學記註則自塾而升諸序自庠而升諸序循循有小大之次序抑篇題則以明倫先後言之學記則以立教次序言之故不同耶

註解體例隨文各異不可執一

禮記曰嚴威儼恪非所以事親也嚴威儼三款實有使人望畏者然恪是恭敬則以恭敬事親亦為合宜於孝子之道而朱子又曰恪是恭敬中朴實緊切處也恭敬朴實尤非切於事親者耶抑此章

所謂恪非所以事親者恪雖恭敬有莊厲之色而亦有成人之道故子於親前不敢以成人之道事之耶

恪與敬同是一義而敬乃始終存主處說恪是容貌氣象間著顯底比柔色婉容意想迥別

子拜父母少拜尊長跪伏之節人皆不同或有先屈兩膝而拜者或有先下兩手而拜者蓋先屈兩膝則近於肅拜肅拜是軍中之拜與婦人之拜而拜中最輕之拜則父母尊長之前不敢以軍中之拜見之也先下兩手則近於稽首稽首是拜君之

拜而拜中最重之拜則父母尊長之前不敢以拜  
君之拜見之也恐不知又有拜父母尊長之拜耶  
拜禮屈膝下手先後當否不敢斷案或於校宮禮場  
用前說君父師長用後說不至大悖也歟  
伏見門下之書年號之用永曆者有之永曆是漂  
海人所傳而非我國之受用者也華翁曰至於永  
曆非我國所嘗受用者而後之秉史筆者奉以承  
統則可至於祭祝之類當紀所嘗受用之元也然  
則門下於文稿中雖用永曆而祭祀則遵用崇禎  
否伏乞明教

華翁專用頒朔年號重翁末年每因文字事多以永  
曆愚有所受之也

司馬溫公通鑑書蜀丞相亮八寇某地云漢魏統  
傳之予奪是大義所存而俾奪堂堂蜀漢之統以  
與凶奸之曹賊溫公德學必不昧於如此至正之  
大義而其理之倒錯何至於此耶且程張諸子終  
無一言規之必知其不聽而難救故未及耶抑亦  
自不辨此義故未及耶

漢統予奪自晉史已然溫公只承襲舊謬而未及更  
張耳至朱子綱目以正之則是乃所謂前人未遑後

人是正者也

竊惟讀書莫如潛心潛心莫如窮理而平日讀書啓丹以究則恍若全然無疑而及其與人說話不敢言其微奧之旨又不敢對其發問之意是則名雖為讀書而其實不潛心窮理故也夫潛心者陳箴所謂端坐欽形提掇此心者也窮理者朱子所謂因其所已知而及其所未知因其所已達而及其所未達者矣今也但知讀其書未能尊瞻視而整思慮操此心而定其居此實名雖為潛心而不潛心者也未嘗應事物而處當否論古今而別是

非此實名雖為窮理而不窮其理者也

潛心窮理不可別立標榜只端莊整一潛心邊事也學問思辨窮理邊事也筭從今日為始自居處動靜推及讀書講義隨處提掇隨地討論整頓得三五次理會得三五事積久不息則庶當有見於心目之間而不至為一場說話幸加致力

答李昌輅 己亥正月十一日

疇昔顧存感荷實多轉眄之頃歲籥載新拜審侍學珍重大度依昨慰祝曷量夫子在座顏曾後先十分好師友莫踰於此且見足下從昆季根基甚好濟之

以見辭之精詳從今以往只在加之意而已朮塗於  
旨恐徒勞而無益也示諭縷縷苟有所得豈不欲上  
下反覆以副芻詢而奈淺拙何蓋沿洛閩之論以開  
門路服洙泗之訓以踐其實則斯為善學者後世乃  
以論性論理為學問究竟法名之曰性理之學假使  
所論十分是當此不過吞未破之棗實不知皮裏之  
甘酸况所論七顛八倒亂道誤人乎但從程朱見成  
說話理會得心是何樣物事理是何樣物事積久反  
覆慎無以它說亂之然後華翁之有功斯文可據得  
其一分不然則眩幻疑信徒歸勞攘而莫可要領幸

加更商至若來示所云折衷以下十字此是大妄談  
即幸抹去無至罪戾帶累之地千萬千萬令從再顧  
誠有所以而顧淺劣滋甚無以警發且夫寄食旅店  
如待行客此豈主人所敢安者耶

答李昌輅 已丑五月十日

俯詢疑義所謂責視聽於警聾過之過矣愚本孤寡  
年且衰頹日用事為大忘小遺矧於心性理氣名目  
顧何敢容喙只以晦翁之訓攷之則於心曰虛靈不  
昧於性曰仁義禮智於情曰愛恭宜別分言則三者  
皆有所指合言則三者同為一理渾然無間然三者

語其所主則心為性情之主性情為心之體用此皆以理言者也以形氣言則心之所舍火臟也形也陰之魄也心之所乘精爽也氣也陽之魂也火臟與精爽即陰陽之器也而亦謂之心者以其神明之所舍所乘也故亦謂之心以是觀之則所謂明德只是本心虛靈不昧說明德意已足者其意躍如不必屑屑帶理氣字說去然後始足也淺見如此未知如何心之本質明德本質本質二字殆涉語病改之是望僕近來伎倆益就剝落下山之勢理應如此奈何奈何

答李昌穆

文相○巳亥正月十二日

朱子曰天以陰陽五行化生萬物氣以成形而理亦賦焉蓋以本原言則有理而後有是氣而此曰氣成理賦豈非氣先理之論乎其在生物之始抑氣先於理耶

曰天以陰陽五行化生萬物則是理先而氣後也曰氣以成形理亦賦焉則是氣先而理後也氣先於理四字不無語病

明倫首章曰鷄初鳴咸盥漱夙興夜寐箴曰鷄鳴以寤昧爽乃興內則陳箴寢興之節亦有鷄鳴昧爽之不同何耶

內則就日用事親上說陳箴以一身工夫上說不須牽連說去

曲禮曰父母存冠衣不純素又曰孤子當室冠衣不純采以上之父母存觀之則下當曰父母沒而曰孤子當室何耶抑孤是無父之稱則母之不沒可知也人子之衣不純采獨在於父之沒而不在於母之存耶

純素純采古制有不可攷嘗見重菴先生早孤奉母平生著純素之服

虞尚之君相與爭田章小學總目已為編入於長

幼之序然後之讀此章者或不從其總目李氏之說下屬於朋友之信然則此章從李氏之說而屬於長幼之序耶從或人之說而屬於朋友之信耶此章骨子只是一讓字而讓固行於事長則從李氏說似當未知如何

從李氏說似宜

經學念書本註釋學經讀書而沙溪曰謂之學經讀書恐不然竒高峰以六經之學所當念之書釋之而愚伏曰謂之所當念之書固誤然則經學是六經之學而念書是讀書之意耶



念是誦念之念無它深意只當依本註說

家禮晨謁條男子再拜婦人四拜云再與四俱是陰數而婦人之拜用其陰數則男子之拜當用陽數而用其陰數何耶且婦拜之倍於男拜抑取何義耶

陽數用全陰數用半婦人二拜當男子一拜

虞祭獻盥執事為之時祭主人為之云云蓋獻盥之節既有虞時之不同則卒禘以後至于練祥從時祭而主人為之歟從虞禮而執事為之歟自虞以前是喪祭而卒禘練祥是吉祭則吉禮從時祭

之禮而主人自為之獻盥耶

卒禘練祥不可同稱吉祭至若虞祭時獻裸一節以孝子哀摧之餘未可兼遑故自以執事代之

退溪曰晨昏當展拜几筵鏡湖曰晨昏八几筵恐當鞠躬作揖而退蓋三年之內無祭神拜以常侍几筵故也觀此則常侍几筵者豈有晨昏拜揖之禮乎先輩所論果有異同伏乞明教

晨昏展拜當從退溪說

昏禮婿婦交拜條云婿揖婦就席又曰婦拜婿答拜抑婦拜婿答拜則婿揖婦當答揖而無答揖

之節何耶

婿揖婦欲其婦之就席也自當無答揖如鄉飲儀賓  
揖介介揖衆賓介與衆賓何嘗有答耶

近觀於祭祀與文字上或有年號之用光武者蓋  
生此王國者時王制令不可不從然抑未知日後  
秉史筆者不可以光號承永曆之統則祭祀文字  
之用光號者豈不悖於大義哉且難於貶君之號  
而暫湏權用無妨耶

國家廟社殿宮及各項文字皆用新式年號則謂之  
時王典禮者容或無異而所云典禮者乃存其大體  
而於損益節目之間略干變通可以行於天下後世  
者非如今日之謂也只當依舊例用崇禎或永曆年  
號似當至若疏章間行不去處又當別論

答李元景

潤星○戊戌七月二十二日

盛課專篤知在塾教篇中此故做人底坯壞也苟罷  
字從其訓句探其義動靜語默必有事焉而勿正朝  
夕乾惕久久積累則所謂收其放心養其德性而有  
以為大學之基本者不待他求而可得之於此矣夫  
子在座顏曾後先何待別般師友而始可曰學問工  
程也耶惟篤與不篤便是公私蹊逕死生路頭千萬

勉旃僕衰頓日甚無可對人言者亦望視為前車刊去枝葉毋貽街人之譏是亦相資之道也未知如何

答李元景 己亥正月十二日

婦之事舅姑男女未冠笄者之事父母也皆用衿纓子之事父母也獨無衿纓婦與幼者皆有穢氣而長者獨無之故不佩歟

婦女容飾自與男子有別不但嫌穢氣之觸尊者而已

禮記曰父母在饋獻不及車馬子之事親也無私貨無私蓄無私器而身且不敢私也則於其假與

饋獻之間不論物之多寡輕重大小皆不敢自專也而獨以車馬言之者舉重而該其輕耶抑細小之物則或有自饋之道耶

父母在凡事統於尊者必稟命而行則其輕者可

若父則遊目無上於面無下於帶蓋上面下帶猶近傲憂故想是禁止者而以下規足視膝觀之則足膝皆在帶下云云

無上無下答應時事視足規膝不言時事不可合而為一

父母有疾食肉不至變味飲酒不至變貌怒不至  
詈疾止復故變味變貌至詈三事事親者雖父母  
安寧之時皆不敢為也何必父母有疾之時乎復  
故即復常也則平常時或有此三事之謂歟  
父母有疾不離床第人之常情易至懈怠當一意洞  
屬酒肉不可過量喜怒不可任情云爾豈以平時而  
聽其變味變貌笑矧怒詈乎勿以辭害旨此之謂也  
孔子曰前貧賤後富貴不去夫之去婦人倫之大  
變也如有不順滂辟之罪不容於覆載之間則豈  
以賤取貴不去之義處之耶

只可酌量輕重而處之

長者之負劔辟咄恐無嚴肅正重之威而反近於  
戲嬉鄙俚之習也戲嬉鄙俚則終無侮凌之弊而  
亦不歸於溺愛不明之曰乎

長幼之序一篇只是卑幼者之事尊長者事且長者  
之於卑幼亦不無不煩耳目從容戒飭之事

以祭義思其所嗜者着之則祭需用其所嗜之物  
恐無害義且以父母生前不嗜之酒陳用於死後  
非其順意抑以醴代酒未知如何

享用氣臭自三代以來未之或改事生事神本自不

同

答李元景 庚子三月

主祠堂者不行晨謁之禮則支子亦可不行歟若欲行之則鎖鑰是宗子之所守也支子何敢自專乎

主人不能則子與孫自當替其父與祖代行異宮而或地遠亦可量其誠力而行之豈可恬然無事

遜愚曰以立為敬中州之禮也以伏為敬我國之禮而伏敬之禮不以為貴今若事生哭死從中州之禮則恐悖於時王之制也若從我國之禮則是

以不貴之禮事之也敢問從何得宜

行禮時其立其伏各有地頭何嘗以中國而偏於立以東俗而偏於伏乎

沙溪曰童子不冠則無孝巾以不冠而無巾經之意推之婦人亦似無經矣

婦人亦自有冠不可與童子一例論

論語一書是孔子之言而或記其門人之私說者何義抑門人所言微有合於孔子之意故取之歟論語全篇只是師生間問答語錄如朱門語類一體且况曾子傳道宰我子貢知足以知聖人以類補入

自是著書體例有甚可疑

子夏曰賢賢易色云云夫父子是人倫之大而一家之內最先行之者也賢賢則必對賢者而後賢之心發也若此賢賢為先親親為後似或無急於人而緩於親之嫌乎

人不親師取友以矯過補不及而曰脩身者殆而故中庸九經尊賢居親親之先而又曰思事親不可以不知人

讀書莫如潛心窮理而潤星對書作思有疑處無疑無疑處生疑此雖云潛心心實不潛也雖云窮

理理實不窮也何如做去乃得潛心窮理之方乎心之存不存只可默默體認不容問人窮理亦非懸空物事如以讀書一事言之一字有一字之訓一句有一句之義細心思繹毋或草率便是其法

答李禹卿

相夏○庚子三月

士喪禮塋前奠無拜禮家禮小歛奠條甲幼者皆再拜云云

士喪禮無拜禮似是孝子遑遽不暇而然也沙翁說亦必有所據未敢質言

虞祭則祝立於主人之右西向告利成卒哭則祝

西階上東面告利成西面東面想是分喪吉之意也然虞祭時祝與主人同位而告者何耶或云虞祭壻祭故未遑造階而於主人位即告此說何如虞祭以壻禮處之卒哭以祭禮處之所以不同或說似然

竊惟同門中或有志不立學不精而為邪說所誘懵然不知而染跡者則當何以處之

好惡人之正性忠告而善道之不可則斥而遠之自是不得已之事也非我也乃道理使之然也然惟先修其在我者然後可以責人之善

答魏致儉

啓溫○戊戌十一月二十八日

男子不絕於婦人之手婦人不絕於男子之手其在母子之間則當奈何

男子婦人云云非母子之謂豈有母没而子不得見子死而母不得臨之義乎

飯舍時米與珠先實于尸口之右以左陽右陰之義推着則似先於左而先於右者何歟

飯舍時先實于右者其亦神道尚右之義歟

大歛後以兩婦人守靈座者何義歟

男僕不敢入門故必使婦人守之而婦人云者通指

女子婢妾而言當於先儒說可攷  
塋時立主人家常禮而若或未造則題主祝文神  
返室堂之語當以何辭改措歟  
魂帛歸家亦當用神返室堂之句而但未立主者至  
於神主既成舍舊從新云云則不得不改以他語  
鼓山先生居塋儀云上食時魂帛不立置以木主  
之義推看則似當立置而不立置者何義歟  
魂帛既非如木主圓首方趺之制則只當臥置似是  
禮意而世俗於朝夕奠及上食時必立置卧立無常  
恐涉不敬

時祭受胙條主人受飯嘗之實于左袂掛袂于季  
指以若賤慮思之實于右袂似便而特於左者何  
義且云掛袂于季指者何義歟  
實于左袂便右手也掛袂必于季指者其亦便於取  
酒卒飲之故也歟

緇服是斬衰餘制而既云總麻則與尋常總服同  
歟儀禮云五服皆有負版辟領衰書儀云大功以  
下去此三者緇服亦當去此否

緇服當遵總麻之制則負版辟領衰三者可去無疑  
人家或未嗣後而當忌祭則雖婦人當主祭若後



配祭前配則紙榜與祝文式稱號何以書之歟  
後配祭前配則紙榜只當書以某封某氏而無祝單  
獻恐無不可

答魏致儉 辛丑九月二十八日

天涯地角所照者心手命落案慰劄罔量小小慎節  
計當次毋勿藥而佔畢家計未必無有時辭緩之慮  
深庸歎仰益近日伎倆日就斲削有何心靈可副詢  
堯之勤而為相長之地者耶只天理無休息久心多  
間斷所以善惡得失差毫繆千而聖狂從以判焉則  
政宜大家提惺不可放頓者此理甚明而行之不力

枯落至此幸左右規為前車倍加疊疊則所謂善惡  
皆師儘非虛語也未知如何

答朴士一 源東○丁酉五月十三日

二度手存次第見領千里直一席也慰何可言當茲  
少壯寸陰可惜鑽研尋數見在甚書飽食煖衣逸居  
無教孟子便呵責以禽獸其意可謂深切而著明矣  
幸抖擻精神切不作閑漫家計專意向前庸續家傳  
緒業也老記病伏園園絕無可為吾友道者一來之  
計無恠其然而此時行役殊涉妄計須勿萌心時因  
便風寄問存沒是坦坦道理也未知如何

答朴士一已亥六月二十五日

晨昏餘暇親近方冊誦念力行有日新不懈之工程耶芳年難再寸陰可惜勿謂前頭之尚遠益加已百之工千萬千萬僕彌年患難餘五官不守百體委荼晝宵伎倆十分昏淙如坐雲霧中殆沒陽界意思殊覺可憐耳齋記非忘也他作可已是則不容但已就木前當有奉副耳

答高季文

禮鎮○庚子正月十二日

千里膏車一其難矣况在再乎是則高明之心之力所以眷注於愚者不啻辛勤而顧愚所以應副者一

無可向人道者故瓊瑤之授不能以木瓜者也何愧如之拜書後居然歲改謹詢省餘動止連膺珍衛玩理存養日有事在日新又新庶不為時俗亂聒所移動否深欲願聞敬怠之間實天理人欲消長之關鍵入于此則出于彼乃自然之事機也須猛下斬釘截鐵底工夫始得悠悠泛泛斷不濟事愚之所聞於先輩者如此聊以奉誦耳

答高季文

庚子十一月

栗谷先生教人以九容九思為先者不可不念蓋九容所以謹之於威儀容止之間九思所以審之於言

行事爲之際是二語者雖非同出於一而其爲涵養  
德性照檢身心之要則二者交相資益不可闕一者  
也苟能從事於此終始不懈則本心不放私邪無所  
容矣理實如此而行之不力老大無聞不可以已之  
不能而昧然於尊者之間也未知如何

答文潤伯圭簡○癸卯四月十八日

示諭滾滾讀有餘味警發多矣至其名忝最靈知不  
居最行不居最虛住百年於天字地堂終爲草叢木  
卒於荒山野水云者則是其喚醒人耳目不啻若鍼  
灸湯熨之切於身病竊欲揭之座側庸作暮境弦常

之資而無斃也

心字不可執一者有血肉之心有氣質之心有本然  
之心血肉之心者五臟之一也朱子所謂心是火臟  
是也氣質之心者此理墮在氣質中不能無清濁之  
不齊聖凡之相懸者也本然之心者人之氣質雖清  
濁不齊聖凡相懸而此理本體初無加損虛靈光明  
洞徹無間者也以大學明德章句言之則人之所得  
乎天以下指本然之心而言也但爲氣質所拘以下  
即指氣質之心而言也血肉之心形也氣質之心氣  
也本然之心理也愚之所聞於先輩者如此幸更入

思而見教也  
等是性也而單指理一邊則曰本然兼指其氣則曰  
氣質之性如太極圖自上圈以下至萬物圈豈非皎  
然者乎

答文成汝

炳斗○戊戌正月六日

即奉手存三復以還辭理條暢筆意縝密若此不已  
其進易可量哉古人楮頌之作真先獲矣乎謹悉伊  
時返面有相百般勞苦之餘履用佳適多少紆鬱有  
同見峴曰消也僕漸頽之際又添一齒其樣可想至  
謂有一日之長而若朶助請益之為則竊不勝矍然

增愧也第聞此事遠大無朝下工而夕收效之理惟  
先其事而後其得正其義而不謀其利勿忘勿助則  
以左右之聰穎其必有犁然不容已之好消息矣愚  
雖老矣將拭目而待之耳

答文成汝

戊戌二月二十五日

歲改春設懲德滋甚忽奉情翰慰荷可量承知三餘  
尚書課程甚篤以左右聰穎勤敏誦數究索比諸他  
人宜其事半功倍而竊見人情困於所長忽於所短  
而得小為足者多有之矣幸於已知已能處益加涵  
養省察之功如何如何夫師友云者師言乎其教我

也友言乎其導我也觀於遠近可當此任者豈云容易惟自得之師尚友之友乃是真師友其次則貴者內好師友林立相望辨質講論綽有餘地何煩枉用心力遠及老朽無聞之一箇棄物而不念傍觀之譏嘲也耶念我念我蓮洞便書尚未入筆前此朋友書字之或付京遞者大半如是亦其慎之

答慎文華 曙辰○己丑二月十八日

千里再枉豈但以偶爾言哉若非勇往直前有古人風者斷不能若是容易心焉愛好迄茲頽頽匪意手命落案細審間來省餘佔畢神休鄭重唱喏暇隙書

再從事想不等閑爲之健誦入有恒言家事牽引未能讀字此皆推托之言非出於誠心也賢於課程昔非不足而荏苒歲月亦甚可惜幸加勉旃遠地相望何以為報聊且仰煩想應諒悉矣

答趙而慶

承善○辛丑十一月十五日

盛課之緣於客擾未得專一固其勢也而何必讀書然後為學云者亦不害為使人務實之格言幸因餘力益加勉旃如何僕病蟄如昨無足奉道惟目前救荒頓無良策者為可悶耳尊族兄小山聲華已久荷此委訪其喜可掬而但所託文字其於陋拙何哉恐

無以副僉賢為先之至意還庸悚仄

答趙而慶

壬寅十一月二十七日

三冬足用又在曾傳全部為之欽仰此書雖甚簡約而修己治人全體大用備盡無餘須一一咀嚼不止為耳目雇傭之地千萬幸甚僕初擬事過後還尋鄉路觸寒生病終是可惜不得已坐停而多少憂端不一而足奈何

答李景五

壬寅二月十日

君之規我殆若門父兄我之懷君曷有其已而別來日月歲已三周塊居幽默只切紆糾即於兒來手珍

入眼謹悉侍彩增重山水樵漁餘力劬書志物咸備心力俱勞居今古道非君而誰歛衽不可已也僕南遷以後無他依賴惟從弟一人心常照應庶以謂更對儀形而翰盡心曲今焉已矣隻影踽踽將何為生故山一行斷不可已者而歛荒道騷出門極艱終未知如何究竟耳手戰略此

答李景五

天命云云

天理而已章句以陰陽五行之以字即有分付主權之意陰陽五行化生萬物既有所以之則此以之者

非理而何

氣以成形而理亦賦焉云云

形一分成理亦有一分形二分成理亦有二分非形完成了理方來寓如屋成完了人方來寓也須知氣以成亦是理如此故氣亦如此方得

為學之方云云

學以立志為先其說皆具於要訣熟讀而詳味之可得其方但今之學者其優者乃好名耳好名之害孟子已言之若言敬真箇親切下手整容貌一思慮使惰慢非辟不入身心若言孝真箇致誠竭力以親之

心為己心奉養無違然後方名為學若在師長面前勉強言學而心實不在於學雖窮年言學于我何事學者當奮發大志勇猛剛厲直以古聖賢自期然後志方有立而庶無他歧之惑矣

與慎敬之

宗軾○甲辰九月二十八日

自我不見于今三載回戀疇昔聯筇徜徉於水聲山色之中者瀟瀟若夢境謹詢侍餘學履一味將進當茲長夜萬計尋思莫如讀書窮研體察昔非不足而道義無限人見易局幸加勉旃記末廢蟄之餘姓名三字露出朝籍偃臥辭免在所不堪扶病前晉擲推

三朔尚未蒙 允許益切悚慄

答魏殷弼

商良○巳亥七月七日

理氣原是合一之物以是物當然之則謂之理即形而上之道也以是物能然之具謂之氣即形而下之器也之二者離亦不得雜亦不得離不得故有則俱有無則俱無雜不得故循其理則無往而不順循其氣則無往而不礙此處最當著眼心亦合理與氣而立名也但指理一邊則曰本心本心即明德古今初無帶氣之明德然則虛靈不昧與所以具衆理應萬事者非心之本體而何愚之所聞於先生長者者如

此只將章句或問等文字反覆玩索則可見未知如何益衰與病謀只一食尸而已何足言

答鄭致行

敏和○丙申五月

日者手蹟宜即奉報久廢筆硯手戟而止雖極矍然想或斟量未審是際尊從叔氣候不暇有損忍飢讀經日有滋潤之味否古之立脚成就者未嘗不自流離困苦中出來君之今日事勢亦是百尺竿頭也須痛加提惺勿使悠泛是老拙之望也

答鄭致行

辛丑六月

早覩此酷有生剗見等是新接謂之何哉只切淪胥



之歎耳茲在料外手命八眼展玩三反慰當對討矧  
又侍奠哀履依前保重者乎尋數家計事勢所牽想  
不專一而險夷燥濕無非吾致力處須礙著脊梁無  
遑退托千萬千萬僕家禍荐臻從弟少我幾年者意  
外傾逝無言其客鄉情緒之如何從少提挈到今依  
賴忽爾至此分外痛惻不啻割去半體一哭之行秋  
以為期而來頭物情未必其道路無事預切關念耳

答郭允道

漢紹○癸卯八月六日

頃者梁雅便惠幅迄茲珍感秋序已仲謹詢侍養震  
良珍重棣床供歡夜燈尋數林樊真趣美加栝是深

庸湖祝損末精神長在雲霧中兼以憂惱着做一字  
不得至如芝浦公文字尚未入思佛氏所云苦海世  
界真實境語也憑聞傳言則四境豈稔人情晏如上  
天之仁愛下民如是懇摯奈人事之不能奉副何故  
土消息才聞無事而路邊物情十倍翔躑三兒團會  
又不容易關心何可言

答郭允道

丙午九月七日

一出門庭萬事亾年而於君戀念未始不往來心上  
也際得珍函眼青十分可敵對展矧茲其內侍履安  
重者乎老拙羈囚頑喘僅過時日只死期將迫無聞

可愧百世知罪只得任之而已

答崔仲說 濟學

當茲驛騷只得安過一日乃一日之福也餘外晝耕  
夜讀慎言語罕出入即是處難方法耳中庸一書朱  
子亦云難看矧以鹵莽膚淺曷可容易議到故犯自  
誣誣人之窠乎第理氣等字姑且置之只從切近處  
字究其訓句繹其旨從容觀貼不遂為馳騫玄空之  
歸是讀書之法也未知如何

答金皓 一商綺 ○甲辰十月二十二日

聞已贊鴈旋即挽鹿大綱已就些少未盡自可次第

整頓區區不賀之賀不容于心三餘計活想應慥慥  
而無言某處欲人心之盡如我心則見今物情難望  
其善始善終弛張操縱當並行而互勉也僕間以河  
魚之疾數朔辛苦幾錄鬼簿偶尋生路豈天假以日  
畢見時人之出場也耶怪事

答吳聖陽 鳳詠 ○壬寅十月二十九日

頓首竊念左右方在哀疚之中守制盡禮念不暇給  
而鄭重問幅乃及於腐朽不齒之物苟非破藩籬均  
物我底力量何以至此揆分競場不容名言且况五  
十知四十九年非伯玉以後曾未聞者而於吾身親

見殆願學而未能何慰如之只天下之事變無窮而  
至微之本心難保幸高明勿恃其所已能而益勉其  
所不及用光吾黨千萬千萬

答吳聖陽

甲辰十一月十日

書訊駕存何等繼續而自我酬接無異越視雖云恕  
諒心其可安陽復不遠政君子道長之日也恭惟動  
止神休大度佳勝贈誦非虛語也鄙人舊疴雖已新  
證交侵失眠喘促難以支吾所懇職名尚靳 恩諒  
未知做甚曲折可脫羈繫也人皆曰 君命若此不  
可不一登文石親昵 耿光而退云者亦是近可之

論而迂踈伎倆卒難破戒亦用悶然

答趙宗顏

愚樵○壬寅九月十六日

泉隱達別悵浮於慰卽奉惠狀以審菊令侍餘服履  
珍勝何等仰賀示論多少足認賢者秉執之牢確也  
但言之非難行之為難幸須十分猛省期作頽波之  
砥柱如何毀形裂冠其來已久匪今斯今而但浸漬  
蔓延以及乎鄉黨間巷則吾恐陽秋一睨無地可寓  
而孔孟程朱之道熄矣尚忍言哉僕歸來矻矻萬念  
都灰而一次省愆斷不可已故將以明日登道期於  
歲內還棲然扶病行役不無關念耳而慶行略此奉

謝不宣

勉菴先生文集卷之十三

勉菴先生文集卷之十四目錄

書

答任三汝 憲英

答尹友三 滋益

答安理卿 基慶

答文義坤 載弘

答安舜在 圭曙

答尹季仁 相麟

答文輔仁 在浩

答吳永之 長燮

勉菴集

卷十四

目錄

一

答朴伯淳 孝東

答文殷重 濟民〇二

答尹仁夫 相義

答文集仲 龍煥  
仁仲宅煥

答洪文寧 祐鎮

答張穉明 善

答尹國斌 厚炳

答曹應深 在升

答曹鳴國 均相

答文見卿 濟龍

答文濟勳

答曹景行 求夏

答曹可陽 岐鉉

答文載聲

答文時昌

答李致善 教宇

答李周汝 教冕

答金志鉉

答金永息

答林基龍

先哲集

答鄭士郁淨珍

答尹敬受相祿

答尹孝述緯赫

答吳聖穆熙文

答李極壽元侑

答姜燧

答金志學

答羅有英

答孫晉蕃

與任明宰

答具在東

答安昌燮

答許鍊

答李弼世三

答都浩望二

答河權默

擬答俞吉濬

與宗人岐瑞鳳煥

答辭顏僉宗

答宗人山五國領

先哲集

卷十四

目錄

三

如者

答宗人雲成 潤彦○二

答宗人季鷹 廷翰○四

答宗人聖度 永煥

答宗人致瑞 景烈○三

答宗人贊瑞 基龍

答宗人士王 錫翰○三

答宗人孟車 秉軾

答宗人忠彥 國煥

答宗人春慶 永煥

答宗人景一 相敦

答宗人敬晦 德煥

答宗人瑞極 瑞煥

與宗人命五 永皓

答宗人克文 汝琬

答宗人應文 鉉遠

答宗人舜瑞 鳳韶○二

答宗人明魯 玉性

答宗人性範 命喜

答宗人性攸 榮紛

答宗人贊玉 秉瓊

如者

卷十四

目錄

四

與嶠南僉宗

答宗人理仲 廷鉉

答宗人道元 和聲

勉菴先生文集卷之十四目錄

勉菴先生文集卷之十四

書

答任三汝 憲英 ○ 己丑七月十四日

向蒙枉存迄庸感戢自後貽阻兼此感炎時節殆一  
年險津也謹詢是辰重堂寢殮別無損愆省餘體事  
亦復衛護胤君因無來音豈非難堪於澹泊而然耶  
為主人者太沒顏矣益鉉轉眄之頃又經禫事喪家  
日月何其遽也益切靡及之痛日前又聞聘母凶音  
四十年眷愛之情豈易忘諸无庸慨廓耳潦叔凉生  
宜有一晉為探近節略伸候儀



答尹友三

滋益○癸巳九月十七日

仲氏先聲往來心上及此握手喜可知也從之惠墨  
出袖蒲紙悃悃豈尋常平安字可比乎因審宿慎差  
復佔畢有相神佑善人理固宜然而疾病之來大聖  
亦慎之少愈之戒類復之慮又不可不加之意也齋  
銘只合覆瓿有此提說還覺愧汗但使居是堂者從  
道理邊做去則君子之堂也從形氣邊做去則小人  
之堂也其幾甚微而未稍判斷不啻天淵小小齋扁  
殆外之外也幸一從日用精密處做得一副工程勿  
庸等閑如何相愛之地忘其僭易漫以奉告庶蒙諒

察也僕老病相尋無可為朋友道者愧歎何言

答安理卿

基慶○戊戌八月十四日

所云工夫非別件物事只日用間當行底道理何必  
兀然對方策不管其他之謂耶古人之躬耕行傭已  
事可監幸勿以是為意隨處照管無至放心如何

答文義坤

載弘○丁酉七月二日

人於少時精力無不足而不肯問學惟此利欲之心  
與之俱長以自喪其良心焉及夫悔心已萌而稍欲  
收拾則氣力已衰又不可強自古豪傑坐此廢墜者  
多如贛上有父祖之教訓下有士友之輔益而年又

正富何患不能學問哉

答安舜在圭曙○丁酉十月十一日

二度珍幅慰感極矣承有鴿原之慟此在凡夫尚不可定情矧若左右之至愛篤倫而又老侍下情地者乎誠切貢念課程間斷勢固然矣而從古樹立成就者未嘗不自憂患疾中做出來何曾以富貴安樂而有多少成名者耶模範取則且尊叔父在焉惟在左右加之意而已

答尹季仁相麟○癸巳九月十七日

書后日富秋色垂暮未審侍讀加邁玩義績文日有

趣味否顧心志不誠豈貧病所誘塵戰一場數節語無非鞭辟近裏自強不息之意所以警省老朽者多矣由是以往將見其火燃泉達沛然莫之禦矣豈不甚盛蓋人心不整則倒工夫不進則退順境做去易逆境做去難幸因其已知已能而求臻乎所未知所未能則何患柔之不修而德之不進也千萬勉旃

答文輔仁在浩○戊戌三月四日

晨昏之餘仰思俯讀不懈益勤可驗日用工程轉見親切所以警發昏惰者多矣至善二字之為斯學頭腦本領可謂知要守約而致知力行須用兩面工夫

乃可收功决非一朝一夕所能容易襲取則只得銖寸  
積累俛焉孜孜不至爲口耳之累是真實底道理也  
僕衰病中又添無妄之憂將不知何日出場甚覺悶  
然耳遯溪文字尚未脫稿少俟之如何

答吳永之

長慶○辛卯四月廿二日

顧此愚陋不合時宜杜門年來萬念俱灰苟聞有讀  
書之士則未嘗不起敬而願見今承座下先施辭旨  
宏暢志向卓越讀書之力果不可誣也病枕蹶然奚  
論平日之面與不面也感極慰極不知所以仰諭至  
若穠道太過喚做別人者恐座下聽於途塗之致也

曷勝汗辭俛焉孜孜斃而後已自有古訓則人生斯  
世豈敢有放過之日而至于挽近政是百倍自強之  
秋也惟願熟讀經傳益講義理以光吾黨

答朴伯淳

孝東

珍重惠問真一字千金也竊計高明上奉庭闈下兼  
薪水殆不遑暇給每按例記念於千里外老醜之物  
意勤事摯未可以毫端套語奉塞其萬一且况以讀  
書一款爲日用事爲上急先務者尤豈不令人喚醒  
處乎聞於先進則拔來報往最是初學之大忌高明  
豈有是也幸須益加勉勵用惜寸陰區區之望也

答文殿重 濟萬○丁酉七月一日  
學問之功雖常時亦不可緩况今坤復交會人獸相  
戰尤當挺身立脚明目張膽各以抑洪驅猛為己任  
而不可辭也此豈非學問而能成者耶

答文殿重

戊戌八月二十三日

吾道著在日用雖非奇高難行而亦不可以一場說  
話容易了勤貴在困而知之勉而行之銖寸積累優  
遊漸進不可若是其太快活而少斟酌也未端所云  
尤不襯貼古所謂好不知惡豈此類之謂歟在左右  
也故言不隱意幸為恕諒

答尹仁夫

相義○癸巳九月十七日

謹奉來教盈幅津津固非自強警責猶恐不及之意  
令人喚醒不容釋手三餘富做正當其時見課在何  
書講得幾箇義理否今日事無可開口處惟自家身  
心頻加照管勿令放倒者庶得寡過幸迨此閒暇大  
家振發無至作輟是究竟法也未知如何

答文集仲

龍煥

仁仲宅煥

○丁酉七月二日

示修齊單方聖賢之訓昭在方冊者無非切要何必  
更求贅語但學者大患悠泛不能勇往直前是以每  
多倒東而來西幸以敬怠二字檢着日用觀其勝負

之機則久久熟習自得路逕矣未知高明以為如何

答洪文寧 祐鎮

一面依依若夢中事今承惠字儘不知千里之為遠也氣質難化是固學者之大患而惟於已知處力行之則其所未知未行者當推此以進矣誠敬二字是其要也賢者幸加勉焉

答張釋明

善○戊辰正月二十四日

頽臥窮林無與為儔珍重尺書自何而來豈所謂千里神交者耶病枕蹶起殆不覺沉疴之祛體也審知感課在小學一部此政做人底坯樣子也朱先生

一心編摩開牖後學之意豈偶然哉念昔寒暄堂一生自稱小學童子清陰金文正公以小學律身其學專主於敬故兩先生樹立成就若是其磊落光明有辭萬世前鑑昭然今左右發軔之初從事此編可謂知要而守約矣望須慥慥勿負今日之心未知如何

答尹國斌

厚炳○壬寅正月十八日

頃蒙尊師門拔例賁趾信宿叙懷而陪從十餘人君不與焉可知其別有事在而悵然則非虛語也通神妙訣愚固未聞如曰有之則何嘗外於日用彝倫之外而別有懸空底物事耶竊計賢者讀書多年未得

要領出此不經之話頭也須從近理會實地體認則庶無佞佞之患千萬勉之

答曹應溪

在升○乙巳三月十日

頃歲奉晤依稀若夢中事茲蒙惠訊驚喜交摯從審伊來學履動止茂膺百祉大度佳勝遠外翹祝奚加於是僕老而不死竟致多少狼狽學之不講無恠其結梢之若是也教文字之役在為先之地外面凡百所宜審慎而誤及陋拙者可謂不思之甚也雖欲無愧其可得乎病枕手戰掛漏而止仰惟默會

答曹鳴國

均相○戊戌六月二十三日

頃者拚別凌遽若夢中枉存老朽何等厚意而適會家故言不盡意餘悵在心不容云喻即茲暑雨旅館動止一例珍衛鄉宅信音續續承聆未御者行止想以疏事出場為限未知事機迅速更如何切切仰念僕兒病一如曩時頓沒差道悶事悶事

答文見卿

濟龍○戊戌八月二十三日

聖賢千言萬語何莫非切已教誨而知之者幾希今左右覺得至此可謂善讀書矣由是以往惟必有事焉而勿正心勿忘勿助長而已有何別般良劑可問於不辭醫技之瞽聾也耶知得時宜若可能行得處

不免窒礙亦是好消息要在立志堅牢積以歲月無朝下切而夕收效之理望須致力鄙人日就漸頓無望振刷百年光陰若是容易而小少之不能自力者良可悔恨有何漚沫可以波及於好問如左右者耶良愧良愧秋夜漸長尊閣在何書竊惟門內師友林立講疑辨惑不出戶庭而恢有餘地為之健誦

答文濟劄

戊戌閏月六日

朝夕佔畢見在小學一部其所以感發善端收斂放心必有日月將就而不容已之勢矣此正平生受用之基本田地朱子所謂真正大英雄莫不從戰兢臨

履上做出來者豈虛語也幸深思體認無怠無荒不至書自書我自我之歸則異日進就詎可量歟

答曹景行

庚夏○辛丑十一月二十一日

別來歲窮雖屬病昏英音雋表森然在耳目間殊難弭忘茲於料外獲奉珍翰備審伊來經履動靜茂納康安其間閱歷閭極駭痛末世滋偽林下措大往往多意外遭罹此亦時運所關也耶一邊商量則亦是玉成處以座下存養之力想不畱意中而益篤進修之功也教諸般所託置之束閣不遑締思從當仰副幸少寬恕勿為促迫如何影幘移奉聞極缺然未知

緣何事端而致此爲南士依仰者只大全而已幸加  
勉焉

答曹可陽 坡銘○壬寅十月四日

山門分解方屬老炎重以道里脩復或慮其未必無  
多少顛沛茲承履用始愆終完佔畢家計日就富有  
爲之健羨僕老境奔忙雖涉無謂若非茲一著其於  
嶺右山川負債多矣容易了勘亦是誇張而恨老矣  
不得盡室移動終始結隣於懿文之側也饋乾肉于  
以見老老之盛念豈只以物看也尊叔父多日周旋  
得未曾有今當去留之際悵然二字尚屬歇后語餘

在續信不備

答文載聲 丁酉七月

昨秋書中言在事先未克有終八字真所謂深得病  
源者矣知得如此便是不如此是藥幸須踴躍振奮  
以不到聖賢不休之意著在肚裏勉勉以進如何益  
自暑月以來尤覺添病西日下山之勢任之而已

答文時昌 丁酉七月二日

奉書審學有次第甚善甚善但蓼莪風樹之意溢於  
辭表足令孤露餘生掩涕腸斷而無餘也孔子稱武  
王周公之孝必以善繼述爲先者蓋因子孫之賢而



父祖之賢益著明故也今賢者能以今者慕先丈之心勤勤讀書立身揚名使先丈之志得伸其孝豈不大哉勉之勉之

答李致善

教字○辛丑五月十六日

奉讀來紙筆好文好命辭周全屬意該悉年雖少矣可師長方真左右之謂也况獲近有道薰陶磨礱言足聽聞由是以往則其將由諸近少而達於遠大也無難矣然道體無休息人心有間斷賢愚聖狂都從此判焉貴在始終一心勿以已往而自足益加勉策寧學古人而未及不欲以一善成名是朋友區區之

望僕少壯蹉跌老益頽廢奄爾作窵壤間一棄物幸視為前車十分懲勵則所謂善惡皆吾師者又豈非進修之一助也耶

答李周汝

教晃○乙巳四月十六日

走年屬崦嵫萬事廢弛但一食尸而止蓬蒙尊慈不避寵之以金玉申之以慰藉盈紙津津令人忘倦示屈首耐煩變辛苦為快活化遲鈍為敏速係是喫緊自道之辭不覺斂衽起敬况其為知本之論而决非雇傭耳目者之比由是以往何理之不可窮而何事之不可做哉甚感甚感伏枕叫苦言不盡意惟祝加

答金志鉉

戊戌九月二日

爵攸告災若爾資斧盡歸煨燼奉率情事一倍艱辛  
 雖屬過境其為貢悶何可勝道外至之患固先民所  
 不能免幸益堅秉執勿為動心讀已讀之書講已知  
 之義振發樹立於頽波懷襄之中則其亦有始凶終  
 吉之感應矣竊以是仰祝僕憤憤無可言外間雖黃  
 無非藥石當劑只可反躬自省而已不敢以是已非  
 人之意存諸腦中耳

答金永息

戊戌十一月二十五日

昔蒙足下不鄙視千里若門庭枉及蓬草之社其志  
 豈偶爾哉蓋將廣聞見長知識為進德修業之地也  
 而顧所存空踈無以副萬一焉則殆瞿然躊躇迄茲  
 未弛即於遞到荐奉手命備審侍養諸節一依簡冊  
 工程不懈益勤區區慰幸奚加於是只朋友往復漫  
 用好語大不濟事須隨事糾正從實稱停無自誤誤  
 人之弊如何雅言承此熟復甚善甚善惟是書也言  
 近指遠知得及易信得及難不可以朝夕得力惟沉  
 潛優游勿怠勿助加以年歲之工然後乃可領略耳

答林基龍

丁酉六月二十七日

美質易得至道難聞力行而不學問則無以考聖賢  
之成法識事理之當然幸諦察此義晨昏餘暇將石  
潭先生要訣等書及小學一部親切下工立得根基  
逐日劄記所疑與所見樂與朋友講磨推之以及於  
四子近思進進不已則庶幾知見日開路脉分明而  
真不負今日之志矣如其不然而但以謙已尊人爲  
務則虛套假式濟得甚事此其可戒而不可因襲使  
此空疎無聞之人重其羞赧而為傍觀之笑也未知  
如何已以此意說與文君還鄉之日似當一場聽悉  
而庶諒鄙意之出自衷曲也

答鄭士郁淳珍○戊戌十二月二十七日

來而有復禮則然矣拜書三年衰如充耳者是可曰  
陽界人物乎懶怠二字不暇論也過蒙恕存存施記  
問感愧交集不容云言示諭之感警發多矣苟有其  
本曷可泯默奈無所得何蓋所稟之性各在當人之  
身初無古今物我之別所由之道近在日用事物之  
間亦非高遠難行之事則人病不取與不為耳更有  
何單傳神方別取外面者耶只冀決意前進

答尹敬受

相祿○乙巳九月二十一日

即奉寵翰謹悉霜令履用動靜連享珍畜秋夜正長

繼晷佔畢想有佳趣未知在何書溪庸翹誦先狀不容退托依教塗乙而賤陋名字徒爲德門之一累則未始不反躬忸怩而悔前者之率爾耳

答尹孝述 辭耕

窮途得拜尊族祖訥翁已是歲寒一遇也因此聲聯氣接並與其門內多少俊彥反復上下則亦可爲山中掌故其爲寵幸何以過此惜乎空踈老態無以奉副其摯意萬一也人貴務本本立而後道生讀書講疑非日用急切者乎餘外悠悠初無可益於身心之實用也庶可黜諒臨紙止此

答吳聖穆 熙文○癸卯五月六日

世衰俗薄凡屬門內人畢鮮見周全况在所不知何人先之以躬存繼之以金玉只茲一事可以見君之所存所養異於衆一等推此本領朶之經傳而慥慥未已則陳了翁我亦可學之訓始知其不我欺矣益少壯不力老益頹敗無足以助下風也日間侍候更何似蒸炎轉甚老幼支遣倍切關心想一般情緒也

答李極壽 元祐○己亥八月

謂外珍幅百朋不爲多備悉年來侍學真腴慰不容喻老人一朽株豈復有燁然時不學便老而衰者往

哲豈欺我哉頭流云行果是傳者之誤也大抵遨遊山水雅來閑漢苦癖而至於頭流尤所願遊者當早晏圖之但今秋家兒以搬移經營來往湖西姑未知未稍之爲如何且近日有不安底情迹鄉里出入尚不容易况於遠方盤遊乎由是而秀南及諸友皆實來而虛歸亦是難安處也高明所示郝處相握者誠是好意然方年富力強之日讀書求志是吾職分視諸汗漫方外其得喪虛實不啻較然矣幸以入孝出弟餘力學文爲究竟法而已無徒馳心外物浪費光陰如何如何

答姜燧

丙午十月四日

疇昔邂逅迄茲依頽入于坎窞誰其問者珍函落前乃知左右之不畏約如是欽祗庸有託乎謹審伊來侍養學履因時晏重何慰如之鄙人事不慮始禱莫真補理勢固然所患無定力未知前頭究竟之如何耳不可無答蚯蚓止此

答金志學

人生日用養親爲大苟其義也執鞭之事尚可爲也况塾師養蒙乃先王定制而兼學半之功者乎唯隨遇盡職不失其道大是難事須勿以已往爲自足益

加強勉用張吾黨是區區之望也僕歲不我與居然  
為望七人矣無述無聞復何足言

答羅有英

拚別許久瞻戀殊切即奉玠函欣慰何言衆楚之嫌  
不足介意聖人之謂獨立不懼良有以也吾南致命  
非徒士林之失望重翁而在者其歔歔傷歎尤當如  
何其身後羨揚門人子姪間似當有任其責者而天  
涯落落無由聞知徒切悽黯僕當此危迫頑喘苟全  
而若干朋輩盡為凋落慨世變之無窮痛吾黨之日  
孤夙夜繞屋殊不知為懷耳

答孫晉蕃

以其為棗梓之鄉也所尋常戀慕於僉賢懿文之地  
者殊非等閑知舊可同日而語也茲於料表珍緘入  
眼亦可見座下心之無異同也謹審寒令侍餘體事  
對時增衛大度寧適慰荷不容言影幘還奉固未知  
緣何委折而晨夕依仰之地其為失望又當何如此  
則似有甚不得已者存而然矣其次則先生之大全  
在焉讀其書尤其道不患無餘地矣幸益加勉旃

與任明宰

癸卯五月八日

麥雨新晴未認此辰侍餘棟歡一例珍畜二穉暨新

生兒子并其母皆無事否戀戀未已此中還棲以後  
連事叫苦見無佳况重以室憂頻復鬼事不遠老者  
例症謂之奈何張老人謂當歷入故為付數字

答吳在東 癸卯

來諭杜門塞竇為畢生究竟之計者固是不易之論  
而只其間合有數轉語以實其題目然後庶理完語  
全不遂為架空鑿虛之歸也未知如何非謂座下有  
盱闕漏而然也似有知而不及之意故漫此贅陳

答安昌燮

不見其人見其子竊嘗接於左右之容貌辭氣而尊  
先丈風儀可想又况如新手澤留在几案時時寓目  
而起殄瘁之歎者乎是則雖蒼黃一面殆不可忘也  
茲奉垂存尤切慰幸教意非曰忘置而文短手拙本  
非其任且以多少疢疾跨年從事事不掛念便爾束  
閣承喻及此還切愧汗萬或安靜工拙間當有奉報

答許鍊 乙丑

聲徽久矣向者李弼世涉海來見相守有日略道湖  
南風物至其俗外豪傑媿媿焉未始不以君為稱首  
心竊歆豔亟欲挾挈嶽超重溟發其緒論而不可得  
則只自懸徃而已不料珍重手幅闌入園中奉讀以

來從知此身尚屬世上感哉何言副紙孤陋昧格不容苛評而第審流動發運生龍活虎底意想雖古之龍眠吳道子無以過之儘覺有其實者名不可掩也且夫引物取譬寓規深切凡盈於天地間者何限而必以此四物者吾知取其松貫四時不改柯易葉竹通中有節牧丹古查而不缺繁華砥柱屹立亭亭不傾陷於頽波也一舉而四美具非止為悅眼玩物真可謂治心之藥石為貺不其多乎謹詢比來攝履何若記末偏蒙 聖眷又脫荐棘可謂生死而骨肉隕越感鑄罔知攸措兼此省親有期私分萬幸

答李弼世

丙子閏五月

以君不畏耽羅之險此來後未嘗不日一往來於心也際見貴侄挾札而至悉近來侍况平善諸百一如慰滿可量民戶之任雖非樂於心者斗料供老亦其道理且因此而愛人利物之地亦不無其效何乃屑屑然有辭去之念耶幸勿以此間動靜為念而輕其去就也吾四載之間兩遷海上豈其所願又况八旬老親情地耶萬事有天定只可任之而已

與李弼世

丁丑

愛日之餘奄罹喪變遠想孝思懇摯號隕何堪勢本



赤立因以飢饉葬埋祭奠能無憾焉者耶只冀節情  
寬哀不至毀瘠亦是事死之一道也吾千里絕域又  
見新年篤老入事情何可量適爾家兒十顛九倒抵  
死來到父子相面雖云大幸纖纖弱質徒步勞碌甚  
切惻然今於歸程非只君意之難孤在我事面亦不  
可愬然勸其暫迂徑由入去之日想當欣握而家間  
企待一時爲急慎勿挽執使其即發向前如何

與李弼世

甲午九月二十一日

霜冰積漸禍亂此極痛哭罔涯遠通同然矧又別懷  
歲已四周千里交情雖欲弭忘得乎春間因河南朴

少年便藥聞年來履用動靜連得佳適掛名虎榜殊  
不寂寞溪庸慰幸老拙家禍未艾自正月洎八月連  
哭伯嫂氏及長子婦與五寸侄兒衰敗景色淚無乾  
日而其中穉孫一箇早失乳道扶養看當又添一事  
主饋等節亦難推過佛氏所謂苦海世界者誰不信  
歎貴邊年事罷一體豐登而厨下凡百或無屢空之  
歎否

答都浩聖

丙子十月

春秋兩問歷入層瀛圻玩再三慰沃難量亦知山河  
之阻不能禁人情之流通也笏審來喻雖不敢當顧

其詞旨通暢義理充足未容以管見有所低仰曾無  
君子斯焉取斯聖訓真不我欺也且其兩先生傳授  
後學之不可不講明云者亦可謂先立其大者而不  
差路脈矣健歎何已

答都浩聖

吾道日孤心確兩翁及尊叔氏相繼淪喪殄瘁之歎  
已無可言况此異類充滿之際廓清開明傾否補敗  
復誰有任其責者乎痛恨痛恨歛跡劬經若將終焉  
是今日正當義諦不容改評可見所存所履决非淺  
俗所窺闖甚感甚感損下義程之初大擬歷申奉接

諸賢畢輸未盡而歸矣及其家近意想一倍忙迫竟  
食前盟雖似無信其情可恕且侍側以來老親粗保  
弟兄團樂到此地頭可謂死無餘憾何幸何幸

答河權點癸巳

放還十餘年海上多少事都屬前塵惟與君周旋一  
著雖欲忘之而不能得窮途情契理合如是而涯甬  
相望徒切夢想料表手墨入眼喜而不寐殊非過語  
也具審間來侍奉百吉趨營悔昔歛退就閒趣味津  
津有不換三公之樂噫當茲熙來穰往出沒歐巴之  
會能辦得此萬夫不能之好箇計活局不甚壯恨不

得一榻對展以悉其裏面多少也老拙風樹餘喘僅支軀殼而頭童眼霧齒濶臂痿百惡俱備要之去死不遠唯是去年始得二孫見方匍匐美前者爲一樂耳新居十二景莫言工拙當留意而或有原韻因便示之如何

擬答俞吉濬乙未十二月七日

蓋鉉逮至京師迷不省罪惟日望朝家處分乃不由聖上傳旨亦不由法司持治忽執事賜以手書始諭終責有若相惜者此何爲者夫不察虛實聞風逕捕與不論罪狀只任議論皆非當權勢者立法施令之

體也愚竊訝焉然嘗觀來書其所以縱橫籠絡變恠百出者皆使人心怖不敢正視而要其大致不過曰今日之勢不可不有更張改革之事也次則曰自上已先斷髮臣下當以從君命爲敬也夫執事之攘臂大談以抑制一國者既在於此而愚陋之彷徨屢回或所以破其迷惑而終不可得者亦在於此不能不一辨之也夫法久則弊生弊生則矯抗此有國之常事而因時制宜之不可無者也國家成法雖甚周美而更張變通之論已自出於中世之先賢况今末世民病國敗夷狄文侵之時哉變之誠是矣改之誠宜

矣然亦有本末輕重之分焉如三綱五常尊華攘夷  
之大經大法本也富國強兵技藝術數末也本之宜  
重末之宜輕此窮天地亘古今而不可易者也今徒  
見弊法之不可不更張而不知綱常之不可墜華夷  
之不可亂也徒知富強之可以并立而不知綱常已  
墜華夷無分則上下無序而萬事不成雖欲富強先  
已敗亡無日而無可致之基矣今以往事證之秦棄  
禮義而二世亡唐雜虜號而終以戎亡項籍隋煬皆  
弑君父而身滅后羿王莽董卓曹操侯景秦檜之徒  
或弑君父母后或挾虜劫君而尋已誅戮彼豈不能

富強而然哉惟其身犯綱常用夷變華而罪無所逃  
天地神人皆共殛之也未本一亂則其末雖備而猶  
不可恃也如此况末亦無之而徒戕其本者哉我  
國自殷師以來已變夷俗至于本朝君君臣臣父  
父子子仁義之教禮樂之俗彬彬與三代相埒此所  
以有小中華之名而及夫神州陸沉以後則又如剝  
几碩果不食之象矣不幸天不悔禍一種倭洋之醜  
騁恠宇內而人面獸心奴顏婢膝之徒從以充滿朝  
廷為賊俚鬼肆其凶惡上以欺蔽吾君下以杜塞  
忠言積累漸漬至有今年八月及十一月十五日之

變遂使舉國臣民盡陷為亂賊之科而天下大界不復有微陽之可寓嗚呼尚忍言哉雖然天道無長往之理人心有必返之期若一朝天心改悟善惡禍福各以類應則竊恐今日之揚揚得意自以為萬年無敗者舉皆如白日之魍魎無可容之處矣今不能反思乎此乃敢大言無忌憚也曰此與時推移也曰使人心振作也甚至上誣孔聖無難斷案曰孔夫子而在者今日亦斷髮也夫孔子作春秋大義數十而尊華攘夷為最大孔子其斷髮矣乎執事又以斷髮之功歸我主上而動輒藉重欲為柑制一世之計嗚

呼夫雖君命有可從者有不可從者皆視夫義之當否而已故其人可殺其道不可毀也其頭可斷其志不可奪也夫如是者豈其甘心樂禍故抗君命哉顧亦有所受於先王守百世聖賢之門庭主一代風俗之汗隆是其關係之重豈可與妾婦以順為正者比哉且况今日之命決非吾君之所為政為如執事者所脅制不得已而為之耳然則苟從非敬也不從非逆也乃所以盡敬也執事又安得以是為言哉至柁末端所謂變故層生而無一言云者愚讀至此未嘗不氣湧如山而繼又慙愧死也夫變莫大於弑逆

罪莫大於不報君父之讐凡我東土舍生之類夫孰  
非吾君涵育之物乎而使甲申至今年八月逆賊  
之輩任其跳踉肆行於朝廷之上如論以王法則愚  
陋當先此逆賊而伏法矣若非執事自知之明而責  
人之至愚或不得聞此言矣然愚亦因此而有所感  
於執事矣夫執事誠亦不以變怪為常事此天理之  
甚顯而人心之不可誣者也執事試更思之凡吾所  
以作此變怪者何故又必引手摩首其所以今我  
古我一也何形影之若是異也當必戚然感動不覺  
淚之自下矣然則執事之功罪已自定於執事之權

衡不知所以自處之道矣執事其亦以為然乎至如  
愚者性本迂疎學又蔑裂其安於舊習誠如所云老  
且愚之甚焉者顧何足有無於世哉然自童卯至今  
年六十三歲其所道者先王之言其所服者先王之  
服其所嚶嚶而朝夕仰鑽者亦不過先王之德行而  
已矣以此短髮舊服歸見先王於地下且以為報  
効吾君之地假使儀秦馳於前斧鉞臨於後豈能  
動其萬一也今執事背負強敵主張世權威焰所加  
無不摧折則何不以此數件事斷愚者之罪施以顯  
戮使天下曉然知守道守正之不可為而賊弑國

母勒削 君髮之爲當然道理也乃反以痛哭 聖  
廟之一小事爲執言區區以文辭覲縷以自損其威  
重耶愚不幸老而不死忍見此時而與今逆賊之輩  
義不當共戴一天矣旣我不能殺逆賊則當死於逆  
賊之手此理之當然也但當閉口俟命不必有所奴  
奴而來書促答益急故草草報謝略撫胸中之萬一  
若夫更張改革之得失與否則有不足論惟諒察

與宗人岐瑞 鳳煥。甲戌六月二日

從叔丈喪事驚愕不可言誰意客歲一拜遂成千古  
之別從此事之凡屬疑難無可就質俯仰慨靡不可

爲懷耳 曩宗罪重罰輕轉輾至此固已榮感而况四  
十年來始見世人之所不見仰瞻漢挈之挿天俯瞰  
大海之無邊其爲浩然殊與坐井而窺天奚啻霄壤  
之間哉此足以向人誇耀也惟是庭候之難憑言之  
哽塞世事之難完者類如是耳

答辭顏僉宗 氏子二月

欽服聲光願欲執鞭者久矣而禍罰殘生出門無階  
瞻望南雲只切翹誦先施教命及於不意拜手擎讀  
悚仄居先只護陋見聞自家先德尚不能貫悉况說  
其他是致過聽一邊妄有云云犯此不韙真可謂駟

不及舌而亦多見其不知量也蓋尊先祖縣監公以下三世懿德傳授一心毫髮無間後來子姓不愆不忘紹述承襲已屬數百年久則無言其時王典式先輩事證之如何便成一家之鐵案決非後生末學所可推遷移動也審矣見今兩家子孫只當以先祖當日之心為心而燕居會同私相講論其義理之盡善與否尚或可也至若謂昔人無聞知而新起爭端同室操戈則殊非使聞於隣國由是言之前此所云正在遺書事實未見之前而然又何足為尊門之大累也耶鄙見如此恕諒如何書出有日伏惟間來僉位

起居更享萬衛竊想淵源古家典型尚存模範柯則非只甲於一省亦可布之宇內而有餘焉則恨不得一番趨走參聽緒論也宗末頑命苟支而當此濡露之節崩隕痛靡一倍如新兩宗氏未休困憊旋即登程千里往返只切關念耳

答宗人山五 國鎮○甲甲

賢胤齋華函不遠千里而至於再顧是其風力之健或於古人尚不可多見况如吾宗之若近日衰替中得之者其慰滿當如何謹審問來尊體萬重尤極聳賀且承先壠石役長第告完此繫闡揚先徽之大政



不敢贊辭而只拙作踈陋不緊著有嫌在掛人眼目  
及傳諸來後極為悚慙幸須十分商量斤正不至醜  
差之境如何宗下依分憤憤無足仰聞只老親氣力  
如日下山蕪回未由冷厨供奉全沒頭緒私切悶煎

答宗人雲成

潤彥。甲午

令抱數日相守見其姿稟清秀動止端重兼以文雅  
夙就可與共學尤以見德門詩禮培養之力決非流  
俗科臼所可彷彿其萬一也由此以往來頭將就詎  
可量耶欽歎不可言宗下七十之年獲戾神明奄吳  
承事之冢婦失乳孩兒見甚矜悶可謂苦海世界也

答雲成

己亥五月二十五日

塊坐窮林誰共晤語忽茲令抱遠存屬意良勤此在  
親而近者尚難多見况踈且遠者乎豈無他人莫如  
我同姓真實境語也重以珍函入手滿幅津津和氣  
可掬備審年來靜體動止連享康寧大度一如慰荷  
可量第令抱之蚤年秀發可與適道曾者逢場略綽  
據知而不意數年之間志氣之牢確見解之通明如  
是其大進也使其因此積累不以有利而勸不以無  
名而漁父祖之誠子孫之勤打成一片弗貳弗參則  
何古人之不可及而流俗緇磷之為患哉是則德門

培養之力不可誣矣而吾宗之一大慶幸奚加於是  
然喜同惡異人之常情不務其遠者大者惟小利近  
功目前是意者十常八九則居門內長老之地勸獎  
振發尤不可不加之意也未知如何宗下滄乘殘命  
因仍苟活忍見許多變亂者令人可憎耳

答宗人季鷹

廷翰○辛卯七月二十八日

客春手命蒲紙纒纒感誦因喻居然秋氣入戶蟬聲  
益清緬仰高風不敢自弛過去兩試得喪何居聖度  
書只報二員赴會而不露出謹某何後形止亦未入  
聞紆鬱不可言宗下長時頽懶無可奉道蓋少沒持

守老益鮮弛理勢固然悔何及追鳳村先生稿塗乙  
之役妄犯手勢決知其萬萬不敢而僉教之下專事  
退托似涉歇後若爾存刪聊以貢愚而已非欲必其  
如是而重違尊畏先德之法門也幸與僉宗氏益加  
梳櫛精之又精勿使見礙於大方眼目千萬千萬

答季鷹

丙申十一月二十四日

吾黨今日事有同無邊鯨海失枕人重以波浪不息  
登岸無期則將恐將懼惟子與汝者政實境語也南  
望嶺雲只庸忉怛即花料外獲奉珍緘滿紙纒纒無  
減親近下席而承接雅誨也從審間來尊體啓居神

休鄭重存養完厚清虛日來亂中欣慰庸有極乎竊  
嘗以爲座下志業之盛期知有大受之日矣命與仇  
謀事與心違則在座下前定固不容以外物得喪攪  
我靈境於宗族士友所嘗愛重之地則殆不勝曠然  
失圖而繼之以太息也益當此世界生非可樂死乃  
宜然而食息偃處有同平人甚覺汗駢來教云云待  
人甚高自道過當反非以實相與之道也未知如何  
鳳村集竣役至此苟非大力量大心力何可容易神  
速如其無憾耶同春所謂萬事莫如好子孫者尤  
可驗也

答季鷹

辛丑八月七日

豈無他人莫如我同族族之多矣至其心齋神會歲  
寒相託又無出座下是則戀德慕義一息未泯之前  
殆不可已也夏徂秋屆涼意襲人尤切頰頰即者尹  
友左顧珍緘入手尺蔡拱璧未足以喻其寶也矧味  
經起居候一例珍衛大度依昔遠外頌祝寧加於是  
二老人之相繼凋零不勝驚愕人生會有此行而其  
平日準的想不若是其倏忽念之惕然尤一倍也南  
氏事無論得失之如何千年定論之下意思何居抑  
以顯自家見識發前人之未發而然歟真可謂蟬蛻

撼大樹一葉何曾零甚見其不自量也聲討勸律斷  
不可已者而僉宗舉措已若此甚可賀也宗下依樣  
打過而客土生受連歲失農前頭茫然始謀不審悔  
之何及只得一日無事是一日之福也

答李鷹 癸卯五月二十二日

別來幾何不惟望八伎倆朝夕待盡抑亦執事之蒼  
顏白髮決非舊日之比矣但願殘年飽喫飯晦翁詩  
語也雖以大賢力量於形氣邊事不泛然者如是况  
以吾輩之素無定力而天又降災日用細瑣不如意  
者十居八九則來教云云乃是先獲我心而無異同

者是病也決非菖蒲茯苓所可醫惟內外兩忘澄然  
無事者乃為近可而亦非一朝一夕所能襲而取之  
謂之奈何仰呵仰呵宗下衰敗日甚下山之勢無可  
奈何昨年嶺表之役非有興致而然蓋緣心火之更  
發亦由河東宗人之敦迫走避不得者而淹滯數朔  
致玄逸傷孫不面之書詰又得不忠不孝亟為踰嶺  
之通章此則常事無足言惟是蘆翁事之發文聲討  
在一室之地有同率其子弟攻其父兄者故與人酬  
酢略有云云而竟致唇舌漸加一層將不知末梢歸  
宿之如何可謂世間事真無不有也只當任之而已

答宗人聖度 永煥○辛卯

屏處溝壑萬緣都消遠蒙御者三度賁臨寒門動色  
未言其存養積蘊之如許槩其愷悌樂易之姿疏通  
縝密之論莫非自詩禮淵源中出來動盪我耳目感  
發我性情者雖欲忘之而不可得矣秉彜好德詎不  
信歎別來多朔只切甫田之思去月末間一封書爾  
自何入眼紙渝字刑殆不可辨及其開展乃宗氏手  
筆始知尊駕入城竊以禮尚往來遠雖不能近可企  
及而有足如縻徒聞聲光歎如之何向後潦炎連熾  
便遞難憑去留遲速荆園得失專屬漠然是可曰畿

甸有宗族乎尤不勝懷注滔滔也逐鹿事已違所料  
幸於明年前期到此因作三夏計活待時而動雖不  
中不遠未知如何

答宗人致瑞 景烈○丁酉九月二十八日

海上拚別居然為數十年事雖不能至頌頌一念未  
嘗不往來心上茲者料表珍函入手披展三復滿心  
慰澆奚啻狂寒而濯清也謹審霜令靜養體字神休  
愷悌衡泌窮約素履坦蕩尤以見古家遺風不墜於  
地也瞻望健誦何能自己只時事之去益倒懸子遺  
生靈頓沒依泊者政是痛哭處也奈何奈何益俯仰

間遽爾爲七旬人物於公於私做得甚事且當變境未即溘然苟活草間令人可憎松菴公文字體制鄭重決非愚昧所可堪任而千里勤教不容默然略加點竄仰副幸加照察從以刪潤無至顯然妄發千萬切望耳

答致瑞

己亥十二月五日

竊詳來教年至衰境有鞭辟自強之勇無因循退步之意只此一事便是平生視履考祥之斷案亦將來種善基福之張本不輕而重也審矣在他人尚可欽仰况於一室之誼其所悅服者豈有窮哉惜乎有足

如縻不克親近下席參承末光也宗下入秋以來百祟侵尋眼眚耳雷重以眩發頓沒佳况若此者亦可曰陽界人事乎只緣此無狀致得遠方朋友之或費好箇光陰在路歧邊者實不勝瞿然之至也歲邑不遠伏祝對序衛重以幸吾黨

答致瑞

辛丑十二月一日

大同之譜此是吾宗幾百年未遑之事而今聞公議出自貴派尊祖敬宗之義何其盛耶當依諸君子指教期助萬一之力而各處宗族之同心與否安可預度也耶第觀下面之如何耳宗下跽伏竊廬日事呻

吟兼以歲逢大無苟活無策形氣之憂亦云支離矣  
今以朝野矜式責老朽者豈非強僇以千斤也耶  
好呵好呵芝山影堂士林主之歟不然則只用後孫  
祭始祖之祝似爲穩當耳

答宗人贊瑞

基龍○巳亥二月十八日

年前枉屈三宿叙話此政戒之而不可得者別來幾  
何厚眷敢忘謹詢伊來稜體康安竊惟衣帶之復吉  
久矣以平日孝思何能堪忍於風樹之痛耶宗末昨  
者一年以无妄患難滾汨度了今雖少可餘悸尚存  
且職名來絆再三丐免而尚無下落甚切伏悶耳

答宗人士王

錯翰

愛而不見心焉如怒及聞尊駕入闈聲光密通意謂  
前此枉屈雖屬慮外而一開路徑杖屨易易未嘗無  
顛若底懷即拜華函審行李中有愆節未卒所幹式  
過其歸私心憮然大失攸圖未知何日利涉而啓處  
凡節能不添劇於問關勞攘之中耶得失有命想必  
以義處之不動素履之萬一而在吾宗期望之地則  
自不覺缺然發喟也但念升降殊道隱現自別安知  
一時之屈不受報於前頭也用是自慰兼以奉勉耳  
示喻縷縷敢不領會其無前定之言何哉

卷之五  
答士玉  
戀湖德儀何日可弛只恨涯角合并未易爲誦夢中  
不識路何以慰相思之句而已茲承教命盥讀再三  
其所欣釋無減對展矧審伊來味道起居一例鄭重  
涵養玩繹有不知老之將至底氣像景仰私忱不容  
言喻俯教縷縷尤以見造理精約樸實無他前賢復  
起倘沒改評至若居今損益用合王道固不敢率爾  
奉稟以犯汰哉而觀象玩占本領已差餘外百務之  
隨而顛倒勢所必至目前矯捩亦當曰反經而已捨  
此頓無好道理矣不審尊意以爲如何

答士玉

心焉愛慕避不謂矣顧自喪亂以來頑愚殘喘未克  
辨主辱臣死之義而苟全軀命則已雖覩然人謂斯  
何所以含忍杜門雖親知密勿不敢以姓名三字妄  
謄紙墨而爲分疏之計也前此料外伏蒙寬恕惠以  
德音蒲紙津津無非自惻怛肝膈中出來噫苟非愛  
我以德而廓然大公之心出尋常萬萬何以及此自  
幸老而不死得此偉論於衆流頽波之中夫君臣大  
經有生之所同也國有大亂雖閭巷下庶尚可扼腕  
振起思所以圖存况今玉石俱焚王室如燬之日在



前啣侍從之列何待職名之有無而爲進退哉實以目前廉恥亦不可不觀無際會而苟且自銜似甚無謂故往者辭章之若是煩碎者政不得不然之事決非猥事高尚徒竊虛聲之計則今茲俯教亦非十分襯切之論未知如何蓋自甲午以來國家滄桑可謂言之短氣所望者惟天意之終當悔禍而百萬生靈或有登岸之勢矣一轉再轉天運去矣人心離矣奈何奈何鄙疏云云雖無發明倘蒙采納則芹曝之獻未嘗無助在日月之明而衆邪之盈只歸一場故紙堆者是應然之事可恨拙謀不審空費許多勞攘也

答宗人孟車

秉執○壬寅七月二十九日

客裏蹤跡安之若家室歡叙如兄弟詩人所謂豈無他人莫如我同姓者政道出今日實境語也即奉手命謹審伊來庭候適以下堂之憂類庸少愆計當不日差復而貢慮則深宗末無端奔走三夏歲月容易消盡在山水聲之中殊覺無謂而三山債帳了勘於垂盡之前者庶可謂不甚寂寥然於公於私有何可補徒費人眷念而已齋記未敢以不文退托雖已奉諾而自茲歸棲則又當向故山歸期又未知的在那時幸少寬暇隙以俟之如何

答宗人忠彥

國煥○壬寅七月二十九日

逆旅凌遽雖未盡情中心藏之何日可忘迤迤跋涉  
歸期在前回首嶺雲徒切悽黯不意令再從拔例更  
存珍幅隨之喜審間來靜養佔畢翫理有相慰百常  
情宗末生老漢北每想嶺右渺渺若天上莫可躋攀  
幸借浪迹一舉而了頭流伽仰之勝再舉而拜茅廬  
先生衣履之巖與夫信宿於香玉堂講修之室而叙  
親戚之情話千里溪山依然若平日門庭者美來平  
生誠一盛事雖謂之不虛作此行未為不可但餘生  
無幾會合難期甚可惜也

答宗人春慶

永煥○丁酉九月十日

伊昔甯穩居然為二十年事不惟我童頭皴面迫於  
遲暮竊恐尊慈典型亦非復小少時節懷仰之餘繼  
以愴感茲於料表伏奉翰命就審靜養體字連膺康  
衛大度珍適遠外荷祝奚加於是益值此喪亂覩然  
苟活俯仰兩間所罪多矣何足道也惟是門戶單弱  
頓沒依賴所欲與仁里僉賢共結援引以終餘年政  
是願言而棗榆餘景百事歸虛臨風引領只切沖悵  
竹坡宗氏遠程曳衰孝思可敬而只所存蔑如無以  
奉副其勤意者為十分可愧耳

答宗人景一相敦○丁酉九月二十八日

僑居踽踽此亦愚之所親身經歷者也未必無多少礙牽而竊想清素家法隨遇舒泰有足自樂只時事艱危不啻漏船則未知明日又如何可悶耳向者贊瑞宗氏扶老遠存留連數日得售前者未盡懷今又尊慈眷存可為山中一掌故也感悚何量宗風樹殘生奄值榆景病蟄斃斃無足仰溷只丁口契活猝當歎歲將不知何以出場亦一關心分也奈何

答宗人敬晦

德煥○乙酉九月二十五日

兩度手命次第入眼三覆愛玩悚感文摯况於年來

搶攘中體上珍衛反身劬經自強不已之意有見於言語文字之外者耶欽敬欽敬天不祚宋喪亂到極漆髮之憂固大同彞情而至如賤子係在策名委質主辱臣死之地苟偷軀命令人有覩復何有向人聲言之力量計策耶來示云云殆怨之深而言之過也柳友聯驂見顧其感何如而只所養鹵莽無一分相資只喫得百般苦辛者極為汗顏耳惟願益懋德業增闡家學以其緒餘推及老朽之物則是真以德之愛也

答宗人瑞極

瑞煥○戊戌二月十一日

茲蒙厚眷辱以手存在餘人尚云感鑄矧於一室之事契乎吾宗貧薄遠通同然又當板蕩之時一倍倒懸十口計活難可扶持則尊慈之捨舊就新雖未詳裏面之緣何而要之不過於此乎於彼乎或者一半分稍勝之道耳未知年來調過之政能免三旬九食之慮否遠地切但毫末無補唯百尺竿頭牢著脚跟力加堅忍勿墜清素家風切仰向逢贊瑞宗拔例賁趾三宿叙懷旋即告別未知近日動靜如何云爾

與宗人命五

永晴○丙戌二月二十三日

昨歲河南便甚屬凌遽寸楮奉唁闕然未遂轉盼之頃三喪已了衣裳復吉回念疇昔汗駢不可言又記先丈平日奚取於我而間關海陸矻矻眷眷而不以爲勞者其意豈徒然哉是篤實忠厚之風朏之往古鮮有比倫而今焉已矣臨紙悽黯曷有其旣饑饉荐臻民情倒懸多口生活何以拮据能不至溝壑境界也耶只庸遠戀而已宗末連年喪禍心力俱竭重以歲惡到此大耋侍情萬難支保而只萬事自有定命固當安之耳相去落落握叙無期惟冀耕稼之餘頗以文字著眼不徒爲閭巷常人之歸千萬幸甚

答宗人克文

汝琬○乙未七月十四日

賦別多年魚雁莫憑雖在餘人尚難弛情矧係是同  
根貧窮孤危無告如君者乎即奉手滋憑審年來侍  
養珍勝佔畢有相何慰如之文字未耜之互相勝負  
誠如來示而一屬性命一屬形氣輕重大小之分尤  
不可不審也要訣小學雖若淺近天下道理盡在上  
面唱喏之餘讀而又讀思之又思行之日用自然有  
得力處不止為口耳之資如何人皆曰我本寒族誰  
能知者而怠於讀字者是自棄其身也宗末間遭期  
功之暇自來殘喘重以漸敗去鬼關不遠良覺可憐

耳

答宗人應文

鉉達○庚子七月十五日

前此既贖以物又辱手命厚意何可忘也宗末河魚  
之證拖至一旬其間調治看當徒貽主人之分外勤  
念幸得差完今將行尋前程千里遠役徒切關心奈  
何但今於南嶺之行未信東都無人况如君已知向  
上之業及此富強做甚事不得也益讀鄒魯遺書克  
紹忠賢舊緒立志遠大之域如何聊付古人贈言之  
義相勉如此惟祝加意進學以副區區之望

答宗人舜瑞

鳳韶○甲辰六月二十九日

兒還得手字知結夏京館竊惟去親遠而為日久定  
省曠而音聞疎先賢至訓當益知其親切也時擾遯  
外傳聞莫非傷心一日二日尚幸無剝膚之禍也耶  
二度去札向遞忘未叔拾今茲付去李許兩君許亦  
以數語伸衷善為致意申望

答舜瑞 丙午九月八日

門外拚別迄茲茹帳一涉滄溟萬緣都空外人相通  
非所可論即奉手字悉旅食履用安勝本筭候度亦  
承源源為之豁意不容云言宗末依分打過無足奉  
聞只八旬殘喘歸骨故山未始不往來心中而萬事

天也奈何奈何唯冀珍畜

答宗人明魯 基性○丙午正月五日

昨夏手翰經秋入眼心焉慰滿固不以早晚為異同  
即又端訊備悉多少感哉何量宗末頑喘苟全忍見  
時事之固極而既不克趁時奔問又未能出計發謀  
以資扶持之萬一名在朝籍人事幾如俯仰慚慙所  
喻人心道心之分屬形氣性命理氣二字之別以主  
宰準則形體氣具雖是先輩定論而苟非喫緊自得  
又焉能信心說出如是的然甚感甚感餘外可待別  
時說耳

答宗人性範

命喜（癸卯三月）

賈君委訪珍幅入眼備悉其間諸節之萬衛慰荷罔  
量宗末邊邊吾行還棲屬耳而多日勞撼餘應尚在  
惺惺無日良覺悶然譜事發文雖我結梢竣功乃在  
少年等善為周旋而窮鄙民情方在嗷嗷其何能容  
易耶蘓城氏所託為其遠懇露拙乃已膚淺鹵莽將  
焉用之所可憾者座下之為人謀殆近不誠之致而  
事已至此奈何

答宗人性攸

榮紛○癸卯十一月四日

南北涯甬雖欲從之末由也已如非橫川事役則幾

其為瞞世人矣慰滿在心何日可忘料表賢胤帶書  
入門未之思也何遠之有政是實境語耳就審伊來  
體事萬重大度佳勝當此捨攘只麼經過是吾輩過  
分之事慰幸何可言影堂廷鉉之從事獨賢未脫債  
帳令人代悶而我病不省無可幫助於一分出力了  
勘周旋苟完唯在如左右一隊之費盡心力然後庶  
可就緒未知其間形止更如何譜事設役未知其如  
何竣切只切悶沓宗末當年經歷摠在憂患疾疢中  
迄今未已此乃久生滋味也耶

答宗人贊玉

秉瓊○壬寅十月四日

豈無他人莫如我同姓三夏路次邂逅知面者多矣  
至其溫雅愷悌於座右始見焉是其惠好無射與共  
終始者其意實浚而山門分解遂作參商歸卧蓬蒿  
只切人遐之歎茲奉手墨謹審伊來重省震良連得  
珍勝為之攢誦不容云言第未知近日尊閣見在何  
書方今蹄迹文橫吾輩性命寄在茫蒼不可料斷幸  
倍加提醒免於淪胥者是正法眼藏未知如何僕下  
山景色日就頽廢頓無向外人道者惟冀進學加重  
與嶠南僉宗 辛丑八月二十六日

同根之義也慨歎何已第惟我先祖文昌先生真像  
禮藏于河東校官于今為幾十年琴川之院墟荒涼  
而無復設之望儒林之公議寂寞而無尊奉之道則  
違祠妥靈寶後孫之急務不可緩者也嗚呼見今世  
降俗頽背祖忘先者滔滔也豺獮猶知報本可以人  
而曾禽斂之不若乎本郡宗人廷鉉慨然于斯將營  
影堂欲伸春秋俎豆之儀而謀及於老朽真吾宗之  
大事而亦可謂先獲我心者也敢不為之竭力幫助  
與共追遠之誠况僉宗君子生長鄒魯之鄉薰沐  
詩禮之風尊賢尚德必有倍於餘人而不待乎勸勉



也須各悉心視以自己獨當之事而不計勢之貧富  
年之豐歉拔例出財期於不日成之而繼以香火之  
資則先生不昧之靈其必曰余有後矣雲仍為先之  
道亦庶幾無餘憾矣古語云精誠所到金石可透我  
崔事業在此一舉幸勿以老耄之言而聽之藐藐如  
何倘少須臾無死期欲致身於影堂一以遂瞻掃之  
願一以叙親戚之情也僉君子幸賜輪照

答宗人理仲

廷鉉○辛丑十一月六日

頃蒙御者遠叩荆扉百代至親儘非虛語且見其干  
城之材金玉之論足以慰此衰頹者多矣心竊以為

吾宗有人而別後焯焯如水東注不意兩度惠問次  
第繾綣最可賀者首體震良之對時珍勝也橫川祠  
宇之開基營建也天佑人順賢侯之眷顧拔例多士  
之聲應無間此莫非座下至誠之所致孰料數十年  
未遑之事乃有待乎今日耶甚感甚感宗下閉戶吟  
病頓無陽界意想而惟於先祖杖屨之鄉不能忘情  
期欲一進而目下歟擾恐為魔障明春事亦何預筭  
記文早晚當有露拙而其他諸作幸與月皐艾山溪  
南諸君子圖之如何

答宗人道元

和聲

令姪年今富有善端方茁而天闕其年奄作九原此  
乃近日吾黨運氣之使然非只專門之不幸第其英  
表雋音森在眼前顯顯如昨日事而今焉已矣痛恨  
奈何譖役聊且了勤而只待推去者避速已矣不意  
召命自天有難偃然則遂父子勞攘出未杳然悶事  
悶事自餘一朔泄痢神魄都喪不能多言

